



INATSISARTUNUT ILITSERSUUT

2023-mi
saqqummersitaq



Imarisai

Kapitali 1	Siulequt	2
Kapitali 2	Inatsisartuni sapaatip akunnera siulleq	4
Kapitali 3	Inatsisartut Siulittaasoqarfiat	6
Kapitali 4	Inatsisartut ataatsimiittarneri	10
Kapitali 5	Ataatsimiititaliat	22
Kapitali 6	Aallartitat, siunnersuisoqatigiit aalajangiisartullu	38
Kapitali 7	§ 37 naapertorlugu apeqqutit.....	42
Kapitali 8	Inatsisartuni partiit.....	44
Kapitali 9	Najuutingikkallarneq.....	50
Kapitali 10	Inatsisartut Ombudsmandiat	54
Kapitali 11	Inatsisartut Allattoqarfiat - suliassat allattorsimaffiat	58
Kapitali 12	Pissutsit suliassanut tunngasut.....	64

Inatsisartut Allattoqarfiannit saqqummiunneqartoq
Marsi 2023

Assit tamarmik: Inatsisartut Allattoqarfiat

Inatsisartut Allattoqarfiat · Postboks 1060 · 3900 Nuuk
inatsisartut@inatsisartut.gl · www.inatsisartut.gl

1

Siulequt

Asasara Inatsisartunut ilaasortaq

Inatsisartut Allattoqarfiat sinnerlugu matumuuna tikilluaqqakkit.

Inuiaqatigiinni nutaaliaasuni tamanillu oqartussaaqataaffiusuni inatsisiliorneq paasiuminartuusariaqarpoq, tunngavilersorluagaalluni qaffasissumillu pitsaassuseqarluni.

Inatsisilianik akuersissutiginninniarluni suliaqarneq inatsisit maleruagassallu atuuttut naapertorlugit pisariaqarpoq aammalu inuiaqatigiinni innuttaasunut tamanut tunngavissiisuusariaqarluni. Piumasaqaatit taakku naammassineqarnisaat Inatsisartunit Naalakkersuisunillu ataatsimoorullugu pisussaaffiuvoq.

Neriuutigaarput Inatsisartuni inatsisiliornermik naalakkersuinermillu suliaqarnermi tunngaviit, minnerunngitsumillu Inatsisartut Naalakkersuisullu akornanni suliaatit agguataagaanerisa ilitsersummi allaaserineqarnerat nassuiaatigineqarnerallu iluaqutaajumaartoq.


Taamaattumik ilitsersummi allaaserisat inatsisinut Inatsisartut Naalakkersuisullu atuunnerannut maleruagassiisunut naapertuupput.

Taamaamat neriuutigaarput ilitsersuut sukumiisumik atuassagit. Tamanna aamma partiit allatseqarfiinut allanullu inatsisiliorluni suliaqarnermik soqutigisaqarsinnaasunut atuuppoq.

Sulinermi pissutsinik assigiinngitsunik ingerlatseriaatsit Inatsisartut Siulittaasoqarfiata ukiut ingerlaneranni aalajangersarsimasai ilitsersummi aamma nassuiaatigineqarput.

Taamaamat neriuutigaarput ilitsersuut sulininni iluaqutigumaarit.

Atuarluarina.



Ellen Kolby Chemnitz
Pisortaq

2

Inatsisartuni sapaatip
akunnera siulleq

Inatsisartuni sapaatip akunnerani siullermi eqqaamassavat

- inuttut paasisutissat Allattoqarfimmut tunniunnissaat (Inuttut normu, najukkannut paasisutissat, oqarasuaatinnut normuutitit, aningaaserivimmi kontunnut normut, akileraartarnermut allagartat il.il.)
- ilinniakkat suliffigisimasallu pillugit paasisutissanik immersuiviup immer-sornissaa Inatsisartullu Allattoqarfiannut tunniunnissaa
- inuussutissarsiutivit aningaasaqarnikkullu soqutigisavit Inatsisartut Allattoqarfiannut nalunaarutiginnissaat (inatsisitigut pisussaaffik)
- assilisinnissat
- Inatsisartut Allattoqarfiannit aqqissuunneqartumik tikilluaqqussutitut pikkorissartitsineranut peqataanissat

Qulaani pineqartut kapitalimi uani erseqqinnerusumik takukkit;
Pissutsit suliassanut tunngasut.

UNGALOQ 1

Inummut paasisutissat, ilinniakkat, suliffigisimasat aningaasaqarnikkullu soqu-tigisat pillugit paasisutissat qarasaasiakkut immersuunneqassapput.

Imatut iliussaait:

- immersugassat uunga aakkit; intra.ina.gl/immersugassat
- qarasaasiannut toqqoriarlugit immersukkit
- pappialamut anisikkat atsiorlugillu
- Inatsisartut Allattoqarfianni Siulittaasoqarfiup allatseqarfianut tunniutikkitt

3

Inatsisartut Siulittaasoqarfiat

Siulittaasoqarfiup inuttarai Siulittaasoq siulittaasullu tullii sisama Inatsisartunit qinerneqartut. Qinersereermermi inissitsiterfiusumik ataatsimiinnermi Siulittaasoqarfimmut qinersisoqartarpoq, tamatumalu kingorna ukiut tamaasa Inatsisartut ukiuata aallartinnerani (septembarimi). Siulittaasoqarfik – partiinut, qinigassanngorteqatigiinnut kattusseqatigiinnulluunniit ataasiakkaanut sinniisuunani – Inatsisartunut tamarmiusunut sinniisuuvoq.

Siulittaasoqarfik Inatsisartut sinnerlugit avammut kiinnertuuvoq - peqatigitillugulu Inatsisartuni sulinerup illersorneqarsinnaasumik aaqqissorneqarlunilu ingerlanneqarnissaa isumagisassaralugu. Siulittaasoqarfik tamatumani suliassanik suqaluartunilluunniit Inatsisartunut Inatsisartunullu ilaasortanut tunngaviusumik pingaarutilinnik suliarinnissinnaavoq, tamatumunnga ilanngullugu Naalakkersuisunik pissusissamisoortumik suleqateqarsinnaaneq. Siulittaasoqarfik Inatsisartut ataatsimiinnissaannut oqaluuserisassanik aalajangersaasuuvoq – Inatsisartullu ataatsimiittarfianni ataatsimiinnermi aqutsisuusarluni.

UNGALOQ 2

Akisussaaffiit suliassaqarfiillu allat (assersuutit):

- Inatsisartunik ingerlatsinermi Naalakkersuisunut - aammalu naalagaaffeqatigiinnermut, Folketingimut Savalimmiumilunilu Lagtingimut – ataqatigiissaarineq.
- nunami namminerimi nunanilu allani pisuni, assersuutigalugu Folketingimi ammaanersiornermi Inatsisartunut sinniisuuneq
- Inatsisartunut pisortatigoortumik tikeraartoqarnerani tikeraartitsuuneq
- Namminersorlutik Oqartussat nersornaasiuttagaannik Nersornaammik nersornaasiisarneq
- ataatsimiititaliat angalanissaannik, sulinnigiffeqarallarnissamik il.il. qinnuteqaatinik suliarinnineq
- qinnuteqaatinik aningaasartuutaaffiusussanik suliarinnineq, soorlu:
 - oqaatsinik pikkorissarnissamut (kalaallisut, danskisut, tuluttut)
 - tarnip pissusaanik ilisimasalimmit ikiorneqarnissamut (qinigaaffimmi ataasiarluni nal. ak. qulit tikillugit)
 - atornerluinermut katsorsartinnissamut (Inatsisartunut ilaasortanut ataasiakkaanut ataasiarluni – kiisalu nakkaateqqinnermi ataasiarluni)

Qinnuteqaatit aningaasartuutaasussat Inatsisartunut maannakkorpiaq ilaasortaasunit nassiunneqartut kisiisa Siulittaasoqarfiup akuerisinnaavai. Taamaalilutik ilaasortat sulingiffeqarallartut qinnuteqaatimik akuerineqarnissaat naatsorsuutigisinnaangilaat. Tamatumali peqatigisaanik qinnuteqaatit akuerinissaat Siulittaasoqarfiup pisussaaffingnilaa. Tamannarpiarlu pissutigalugu Inatsisartunut ilaasortap qinnuteqaatimi akuerineqarnissaa piumasaqaatigisinnaangilaa.

Inatsisartut Siulittaasoqarfiat partiit kattusseqatigiillunniit Siulittaasoqarfimmi ilaasortaatitaqanngitsut tamarmik immikkut sinniisuutitaat Inatsisartunit qinikkat peqatigalugit Inatsisartut Suleriaaseq pillugu Ataatsimiititaliaattut atuuppoq. Ataatsimiititaliap suleriaatsimut, taassumalu allangortinneqarnissaanut tunngassuteqartut suliarisarpai, tamatumalu peqatigisaanik Inatsisartut missingersuutaasa akuerineqarnissaannut pingaarnertut akisussaasuulluni.

Siulittaasoqarfimmut saaffiginnissutit - ilaasortanut ataasiakkaanut nassiunneqaratik - uunga nassiunneqassapput; ina@ina.gl. Saaffiginnissutit piffissaaluartillugu, minnerpaamillu nalunaquttap akunnerinik 24-nik piffissaqartitsilluni nassiunneqassapput.

4

Inatsisartut ataatsimiittarneri

Qinersisoqareernerani piaarnerpaamik kingusinnerpaamillu ullut 45-t qaangiuneranni Inatsisartut inissitsiterfiusumik ataatsimiigiqquneqassapput. Aallaavittut Inatsisartut ukiuanni Inatsisartut ukiumut marloriarlutik ileqquumik ataatsimiittarput (upernaakkut ukiakkullu) – aammali Inatsisartut Siulittaasuata pisariaqarsorigaangagu immikkut ittumik ataatsimiitinneqarsinnaasarlutik. Kiisalu Naalakkersuisut Siulittaasuata imaluunniit ikinnerpaamik Inatsisartunut ilaasortat affaasa piumasarippassuk Inatsisartut ataatsimiigiqquneqassapput.

Namminneq nalunneqatiginnissuseq

Inatsisartunut ilaasortat sulinerminni namminneq nalunneqatiginnissusertik kisiat tunngavigissavaat. Taamaalluni ilaasortaq nammineq nalunneqatiginnissutini isummanilu tunngavigalugit qanorluunniit taasisinnaavoq – tak. Inatsit Tunngavisoq (§ 56) kiisalu Inatsisartut Naalakkersuisullu pillugit inatsit (§ 5). Ilaasortarli amerlanertigut partiimi qinersisimilu isumaqatiginnissaanik taasisarpoq.

Oqaluuserisassani immikkoortut

Inatsisartut ataatsimiinnissaat sioqqullugit oqaluuserisassat suliarineqartarput. Oqaluuserisassat Inatsisartut ataatsimiinnissaannik immikkoortunillu oqaluuserisassanut ilanngunneqartunik takussutissiipput. Inatsisartut ataatsimiittarfianni oqaluuserineqartut immikkoortunik taaneqartarput. Immikkoortut makku oqaluuserisassanut ilanngunneqarsinnaapput:

- Inatsisartut inatsisissaattut siunnersuutit
- Inatsisartut aalajangiiffigisassaattut siunnersuutit, taakkunungalu ilanngulugit nunani tamalaani suliniaqatigiiffinit kaammattuutit taperserineqarnissaannik siunnersuutit aammalu nunat tamalaat isumaqatigiissutaasa il.il. kiisalu danskit inatsisaasa Kalaallit Nunaannut atortussanngortitassat Inatsisartunit oqaaseqarfigineqarnissaat pillugit siunnersuutit
- Apeqquteqaat aallaavigalugu oqallisissatut siunnersuutit
- Nassuiaatit
- Ataatsimiititalianut, siunnersuisoqatigiinnut, aalajangiisartunut, Siulittaasoqarfimmuut aamma Naalakkersuisunut ilaasortassanik qinersinerit
- Sapaatit akunnikkuutaartumik akunneq Naalakkersuisunut apeqquteqarfik
- Inatsisartut ataatsimiinnerini partiit siuttuunik apeqqarissaarneq ataaseq


Inatsisissatut siunnersuutit aamma aalajangiiffigisassatut siunnersuutit oqaluuserineqartarnerannut tunngatillugu **titartakkat 1 aamma 2 takukkit**. Inatsisissatut siunnersuutit aamma aalajangiiffigisassatut siunnersuutit arlaleriarlutik oqaluuserineqartarnertik taasisutigineqartarnertill allaanerussutigaa.

Apeqquteqaalli aallaavigalugu oqallinnermi apeqqummut aalajangersimasumut Inatsisartunut Naalakkersuisunullu ilaasortat tunngaviusumik isummersuutiminik saqqummiussisarput. Tamatumani apeqquteqaat aallaavigalugu oqallisissiaq inuiaqatigiinni annertuumik pingaaruteqarnermi saniatigut sammisamut maanakkut pineqartumut tunngassuteqartarpoq.

TAKUSSUTISSIAQ 1

Inatsisartut siunnersuut

INGERLARIAASEQ



AAMMALI IMATUT PISINNAAVOQ

Soqutigisallit, suliniaqatigiiffiit, tusagassiorfiit innuttaasulluunniit inatsisip ilulissaanut akuerineqarnissaanulluunniit suliarinninnerup ingerlanngani tamarmi sunniuteqarniarsinnaapput. Taamaaliortarput Naalakkersuisut, partiit Inatsisartulluunniit ataatsimiittitaliaani susassaqartumi sunniarnikkut. Sapinngisamik siusissukkut sunniuteqarniaraanni sunniuteqarnissaq anginerussaaq.

Suliniaqatigiiffiit innuttaasullu ataatsimiittitaliaamut susassaqartumut sassarumallutik qinnuteqarsinnaapput. Taamaaliornikkut uparuaatigiumasatik allannguutissatullu siunnersuutit imaluunniit siunnersuut akuerineqassappat naapertuutinningsut maluginiaqquisinnaavaat.

Pisortatigoortumik aalajangiiniarnerup ingerlanneqarnerata immikkoortuini tamani pisortatigiuunngitsumik ingerlatsineq pisinnaavoq.

Aappassaaneerinnineq

Inatsississatut siunnersuummi im-
mikkoortut oqaluuserineqassapput.
Allannguutissatut siunnersuutaasin-
naasut taasissutigineqarput, soor-
luttaaq inatsississatut siunnersuutip
tamarmiusup pingajussaaneerineqar-
nissaa taasissutigineqartoq.
Ataatsimiititaliap isumaliutissiissu-
taa oqaluuserinninnermut ilaatinne-
qassaaq.

Pingajussaaneerinnineq

Siunnersuut sivi-
kitsumik oqaluuse-
rineqarpoq.
Allannguutissatut
siunnersuutaasinna-
sut taasissutigine-
qassapput, naggataa-
tigullu siunnersuut
tamarmiusoq taasis-
sutigineqassalluni.

Siunnersuut Inat-
sisartuni amerla-
nerussuteqartunit
taperserneqanngilaq
atortussanngussa-
nanilu.

Ataatsimiititaliap
isumaliutissiissu-
siorpoq, tassani
siunnersuut siuarsar-
neqarluni, itigartin-
neqarluni imaluunniit
allannguutissatut
siunnersuummik sa-
qqummiussisoqarluni.

Siunnersuut ataatsi-
miititaliamut
nutaamik suliarine-
qartussatut ingerla-
tinneqarsinnaavoq,
tamatumalu kingorna
ataatsimiititaliap
ilassutitut isumaliu-
tissiissuteqarluni.

Siunnersuut
Inatsisartuni
amerlanerussuteqartunik
taperserne-
qarpoq akuer-
sissutigine-
qarlunilu.

Inatsississatut
siunnersuut
atortussan-
ngortinneqar-
poq tamanullu
nalunaaruti-
gineqarluni kii-
salu inatsimmi
ulluliussaq
naapertorlugu
atuutilerluni.

Soqutigisallit, suliniaqatigiiffiit, tusagassiorfiit innuttaasullu
naalakkersuinikkut partiini attaveqaatimikkut, aviisitigut
allaaserisaqarnikkut, oqallinnermi peqataanikkut oqallittarfikkullu
tamanut ilisimatitsissuteqartarput.


Suliniaqatigiiffiit innuttaasullu ataatsimiititaliamut susassaqartumut sassarumallutik
qinnuteqarsinnaapput. Taamaaliornikkut uparuaatigiumasatik allannguutissatullu
siunnersuutitik imaluunniit siunnersuut akuerineqassappat
naapertuutinningsut maluginiaqquisinnaavaat.

TAKUSSUTISSIAQ 2

Aalajangiiffigisassatut siunnersuutit

Siullermeerinnineq

INGERLARIAASEQ




AAMMALI IMATUT PISINNAAVOQ

Soqutigisallit, suliniaqatigiiffiit, tusagassiorfiit innuttaasulluunniit aalajangiiffigisassatut siunnersuummik suliarinninnerup ingerlanngani tamarmi sunniuteqarniarsinnaapput. Taamaaliortarput Naalakkersuisut, partiit Inatsisartulluunniit ataatsimiititaliaani susassaqartumi sunniarnikkut. Sapinngisamik siusissukkut sunniuteqarniaraanni sunniuteqarnissaq anginerussaqaq.

Suliniaqatigiiffiit innuttaasullu ataatsimiititaliamut susassaqartumut sassarumallutik qinnuteqarsinnaapput. Taamaaliornikkut uparuaatigiumasatik allannguutissatullu siunnersuutitik imaluunniit siunnersuut akuerineqassappat naapertuutinnigitsut maluginiaqqusinnaavaat.

Pisortatigoortumik aalajangiiniarnerup ingerlanneqarnerata immikkoortuini tamani pisortatiguunngitsumik ingerlatsineq pisinnaavoq.

Aappassaaneerinneq



Soqutigisallit, suliniaqatigiiffiit, tusagassiorfiit innuttaasullu naalakkersuinikkut partiini attaveqaatimikkut, aviisitigut allaaserisaqarnikkut, oqallinnermi peqataanikkut oqallittarfikkullu tamanut ilisimatitsissuteqartarput.


Suliniaqatigiiffiit innuttaasullu ataatsimiititaliamut susassaqartumut sassarumallutik qinnuteqarsinnaapput. Taamaaliornikkut uparuaatigiumasatik allannguutissatullu siunnersuutitik imaluunniit siunnersuut akuerineqassappat naapertuutinnigitsut maluginiaqqusinnaavaat.

Nassuiaat tassaavoq nalunaarusiaq nassuiaasiarlunniit amerlanertigut allakka-tigut saqqummiunneqartartoq. Naalakkersuisut namminneq kajumissutsiminnik pissutsit tamanut tunngasut pillugit nassuiaasiorsinnaapput aammali – aalaja-ngiiffigisassatut siunnersuummik akuersissuteqartoqarneratigut – pissutsit aalajangersimasut pillugit nassuiaasioqqullugit peqquneqarsinnaallutik. Nassuiaat taamaalilluni aallaavittut isumaqatigiinniutigineqarneq ajorpoq taamaal-laalli Inatsisartunut ilaasortanut agguanneqartarluni. Nassuiaatilli ilaat Inatsi-sartut Ataatsimiittarfianni tamatigut oqaluuserineqartarput:

1. Naalakkersuisut Siulittaasuata Inatsisartut ukiuata aallartinnerani Inatsisar-tunut nassuiaataa
2. Naalakkersuisut Siulittaasuata Inatsisartunut qinigaarlananut nassuiaataa
3. Nunanut allanut tunngasumik nassuiaat
4. Aningaasaqarnikkut ingerlatsineq pillugu nassuiaat
5. Nassuiaatit inatsisit malillugit Naalakkersuisunit Inatsisartunut saqqummiun-neqartussaataitaasut, taakku isumaqatigiinniutigineqarnissaat Naalakkersui-sunit kissaatigineqarpat.

UNGALQ 3: INATSISEQARTITSINERMI TULLERIAARNERIT

Inatsisit aalajangersakkallu assigiinngitsut tunngavigalugit tulleriaarnerit eqqortut taakkulu imminnut attuumassuteqarnerat



Inatsiseqartitsinermi tulleriaarinerup malitsigisaanik Inatsit tunngaviusoq – inat-sisinit, nalunaarutinit, kaajallaasitanit najoqqutassanillu salliullunilu pingaarne-ruvoq. Taamatuttaaq inatsisit, nalunaarutinit, kaajallaasitanit iltersuutinillu il.il. pingaarnerupput.

Inatsit tunngaviusoq Danmarkimut, Savalimmiunut aamma Kalaallit Nunaannut atuuppoq. Kalaallit Nunaanni namminersorneq Inatsisup tunngaviusup killiliusaasa iluini namminersorneq pillugu (2009-mi) inatsisiliornikkut pilersinneqarpoq.

Namminersorlutik Oqartussani pissaaneq inatsisiliortussaataitaasunut (Inatsisar-tut) aamma atuutsitsisussaataitaasunut (Naalakkersuisunut) agguataagaavoq. Tassa imaappoq Inatsisartut inatsisinik akuersissutiginnittarput tamatumalu kingorna inatsisit Naalakkersuisunit atuutsinneqartarlutik. Tamatumani Naalak-

KAPITALI 4

Inatsisartut ileqqusumik ataatsimiinneranni oqaluuserisassani immikkoortoq aalajangersimasoq tassaavoq sapaatit akunnikkuutaartumik akunneq Naalakkersuisunut apeqquteqarfik. Akunneq apeqquteqarfik nalinginnaasumik pingasunngornikkut ingerlanneqartarpoq, tassanilu Inatsisartunut ilaasortat oqaasiinartigit aamma nalunaarutigeqqaarnagu Nalaakkersuisunut ingerlaannaq akisassanik apeqquteqarsinnaapput. Naalakkersuisup pineqartup apeqqut ingerlaannaq akisinnaangippagu Naalakkersuisup kingusinnerusukkut allakkatigit akissuteqarnissani toqqarsinnaavaa. Apeqqutit ataasiakkaarlugit ingerlanneqartarput, tamatumani partii anginerpaaq aallarniisuusarluni partiillu ataasiakkaat apeqqutini ataasiakkaani ataasiarlutik aperisinnaallutik.

kersuisut - inatsisit tulleriiarneqarnerisa malitsigisaanik - aalajangiisinaati-taapput, aalajangiinerilli inatsisinik tunngaveqassapput aammalu inatsisitigit killiliussanut Inatsisartunit aalajangersarneqartunut akerliunngilluinnassallutik.

Malittarisassanik erseqqinnerusunik aalajangersaaffiunermikkut nalunaarutit inatsimmik timitaliinnermut atorneqartarput. Nalunaarutit Naalakkersuisunit atuuttussanngortinneqartarput - taamaallutillu oqartussaaffinnut Inatsisartunit Naalakkersuisunut ingerlatassanngortinneqartunut ilaallutik. Nalunaarutit inatsisit naapertorlugit oqartussaasunut innuttaasunullu pituttuisuupput - aatsaallu inatsimmi aalajangersakkakut tamatumunnga piginnaatitsineq ersarissumik allassimappat atuuttussanngortinneqarsinnaalluni.

Kaajallassitat imaluunniit atorfilinnut peqqussutit, soorlu aamma taamatut taaneqartartut, malittarisassat oqartussaasunut sammitinneqaraangata atorneqartarput. Kaajallaasitat / atorfilinnut peqqussutit innuttaasunut pituttuisuunngillat. Oqartussaasut kaajallaasitamik atuuttussanngortitsisut pisut ilaanni kaajallaasitamit immikkut ittumik akuersissuteqarsinnaasarput - aatsaalli tamatumunnga tunngavissaqarluarpat.

Ilitsersuutit najoqqutassalluunniit oqartussaasunut aamma innuttaasunut sammitinneqarsinnaapput. Malittarisassat imarisaannik tunuliaqutaannillu ilisimatissisuteqarnermi aammalu malittarisassat qanoq paasineqarlutillu aqutsivigineqarnissaannik paasissutissanik nalunaarutiginninnermut atatillugu ilitsersuutit ilusiliineq atorneqassaaq. Ilitsersuutit innuttaasunut pituttuisuunngillat.

Ilusiliinissamat piumasaqaatit

Immikkoortoq Inatsisartut ataatsimiinneranni ilanngunneqassappat ilusiliinissamat piumasaqaatit naammassineqarsimassapput. Ilusiliinissamat piumasaqaatit Siulittaasoqarfimmit aalajangersarneqartarnermik saniatigut Inatsisartut Sule-riaasiatigut aalajangersarneqartarput. Ilusiliinissamat piumasaqaatit qaquguk-kulluunniit atuuttut pillugit nassuiaat uani nassaarineqarsinnaavoq;

www.ina.gl-imi

Maleruagassat pingaarnerit tassaapput:

- Inatsisartut inatsisissaattut siunnersuutit inatsisissatut ilusiligaassapput aammalu nalinginnaasumik nassuiaatitaqarlutillu immikkut nassuiaatitaqas-sapput, tassungalu ilanngullugu siunnersuutip aningaasaqarnikkut allaffissor-nikkullu kingunerisassa allaaserineqarsimassallutik
- Inatsisartut aalajangiiffigisassaattut siunnersuutit Inatsisartut aalajangiiffi-gisassatut ilusiligaassapput, tassungalu ilanngullugu siunnersuutip aninga-asaqarnikkut allaffissor-nikkullu kingunerisassaasa allaaserineqarnerannik imaqartumik tunngavilersuuteqassallutik.
- Apeqquteqaat aallaavigalugu oqallisissatut siunnersuutit aalajangersimasu-mik ilusiligaassapput, tassunga ilanngullugu tamanut attuumassutilinnut tunngasuussallutik.

Ilusiliinissamat piumasaqaatit allat pingaarutillit ukuupput:

- Inatsisissatut aalajangiiffigisassatullu siunnersuutitut allannguutissatut siunnersuutit kingusinnerpaamik ulloq suliarinniffissaq ullormik ataatsimik sioqqullugu kalaallisuunngorlugit danskisuunngorlugillu agguanneqarsimas-sapput.
- Allannguutissatut siunnersuummik saqqummiussisoqassappat allannguutis-satut siunnersuut siunnersuutaaqqaartumik siunertarineqartumik allanngui-suussanngilaq. Siunertarineqartumik allannguinnginnissaq pingaaruteqarmat tamatumunnga tamatumunnga qulakkeeriniarlutit ataatsimiititaliat allatseqar-fiinit ikiorserneqarsinnaavutit.

Tatiginninnginnermik oqaluuserisassanngortitsineq

Tamatigut ataatsimiinnermik aqutsisumut kalaallisut danskisullu allaganngorlugu tunniunneqartassaaq kiisalu qarasaasiakkut Inatsisartut pisortatigoortumik e-mailiannut nassiunneqarsimassalluni.

Siunnersorneqarniarluni ilitserorneqarniarlunilu Inatsisartut Allattoqarfiannut saaffiginnittoqassaaq.

Siunnersorneqarnissaq ilitserorneqarnissarlu pillugit Inatsisartut Allattoqarfia-attaveqarfigineqassaaq. Inatsisartunulaaq siunnersuutimi ilusilersorne-qarnera pillugu ataatsimiititaliamut allatsimit qaqugukkulluunniit ikiorneqarsin-naavoq. Ilusiligaaneratali misissorneqarnissaanut siunnersuutip nassiunneqan-ginnerani partiip allattaannit suliamut naalakkersuinerumullu tunngasumik siunnersorneqaaqqaartarnissaq kaammattuutigineqarpoq. Piffissaalluatillugu kingusinnerpaamillu ataatsimiinnissaq sapaatit akunnerinik arfineq-marlunnik sioqqullugu saaffiginnittoqassaaq. Siunnersuutit ilusiligaanikkut misissorneqar-tussanngortitat ina@ina.gl-imut nassiunneqassapput.

Nalunaarutiginninnissamut killissarititaasoq

Immikkoortut Inatsisartut ataatsimiinnissaanni oqaluuserisassanut ilanngunneqarnissaat qinnuteqaatigisat Inatsisartut ataatsimiinnissaata aallartinnissaa kingusinnerpaamik sapaatit akunnerinik tallimanik sioqqullugu nal. 12.00 Inatsisartut Siulittaasuannut saqqummiunneqarlutilluunniit tunniunneqarsimassapput. Immikkorluinnaq ittumik pisoqartillugu nalunaarutiginninnissamut killissarititaasumik qaangiinissaq Siulittaasoqarfiup akuersissutigisinnaavaa, tassa pissutsit immikkorluinnaq ittut pissutigalugit nalunaarutiginninnissamut piffissaliussaq eqquutsinneqarsinnaanngitsoq Siulittaasoqarfik naliliippat.

Apeqquteqaat aallaavigalugu oqallisissiatut siunnersuut kingusinnerpaamik Inatsisartut ataatsimiinnissaat apeqquteqaatip suliarineqarfissaatut kissaatigineqartup aallartinnissaa sapaatip akunnerinik marlunnik sioqqullugu nal. 12.00 Inatsisartut Siulittaasuannut tunniunneqareersimassaaq.

Piffissaliussap qaangiunnerani immikkoortut tiguneqartut Siulittaasoqarfimmi misissorneqassapput. Tamatumani immikkoortut ilusissatut piumasaqaatinik naammassinninngitsut itigartitsissutigineqassapput. Tamatuma kingorna oqaluuserisassat immikkoortunik ilanngunneqartunik imaqartut Inatsisartut nittartaqaannut ikkunneqassapput.

Inatsisartut ataatsimiittarfianni oqaluuserisassanik oqaluuserinninnermi ileqqorissaarnermut najoqqutassat

Ileqqorissaarnermut najoqqutassat Inatsisartunut ilaasortanut, sulisunut pulaartunullu tamanut atuuttut UNGALOQ 4-mi eqikkarlugit allattugaapput. Tamatuani ileqqorissaarnermut najoqqutassat inatsisartoqarnermi sulinerup torersumik aammalu avataaneersut Inatsisartunik ataqqinninnerannik innarliinngitsumik ingerlanneqarnissaanut peqataassapput.

Najoqqutassat pingaarnerit tassaapput:

- Ilaasortat Inatsisartut ataatsimiittarfianni ataatsimiinnerminni ataatsimiinnermi aqutsisup innersuussutai malittassagaat. Inatsisartut ataatsimiittarfianni ataatsimiinnermik aqutsisoq isornartorsiorneqarsinnaanngilaq. Inatsisartunut ilaasortap ataatsimiinnermi aqutsisup aqutsinera naammaginngikkuniuk tamanna kingusinnerusukkut Siulittaasoqarfimmut allakkatigut saaffiginnissutigisinnaavaa
- Inatsisartunut Naalakkersuisunulluunniit ilaasortat Inatsisartut ataatsimiittarfianni isumaqatiginninniarnerni saqqummiussinnermi taaneqartut aqqi kinguliaqutaallu aamma taaguutaat (Naalakkersuisunut ilaasortamik innersuussisarpat) taaneqartassapput
- saqqummiussat nalinginnaasumik ikittuinnarnik issuaanertaqartassasut – tasami taakku Inatsisartut ataatsimiittarfianni uummaarissumik oqallinnermut siuarsaataasutut isigineqanngimmata. Ataatsimiinnermik aqutsisoq aatsaat akuersereerpat issuaasoqartassaaq. Tamatumani issugaq sumi aallartinnersoq naanersorlu – aamma issugaq sumit aaneqarsimanersaq erseqqissumik allassimassaaq. Paasissutissaassaaq tamanit pissarsiarineqarsinnaasuusooq, assersuutigalugu tusagassiorfinni allaaserisamit, nassuiaammit assingusumilluunniit tigulaagaasimassalluni. E-mailinit, sms-init, nalunaarutinit allanillu inunnit namminerisamik pigisanit issuaasoqassanngilaq.

- saqqummiussinermi Siulittaasoqarfik, atorfilittat allalluunniit Inatsisartut Naalakkersuisullu avataanniittut isornartorsiorneqassanngitsut. Taamaalil-lutik pissutsit Siulittaasoqarfimmut tunngasut – Inatsisartut tusaamaneqar-nerat eqqarsaatigalugu – tamanut ammasumik oqaluserineqartussaangit-sutut isigineqarput. Aamma atorfilittanik allanillu isornartorsiuinerit pissusilersornerlunnertut isigineqarput. Taamaattoqartillugu atorfilittat im-minnut illersornissaminut periarfissaqarneq ajorput. Naalakkersuisut akisus-saanerannik tunngavik naapertorlugu atorfilittat iliusaannut Naalakkersui-soq/Nalakkersuisut Siulittaasuat maleruagassatigut naalakkersuinikkullu akisussaasuvoq.

Tusagassiortut Inatsisartut ataatsimiittarfianni najuussinnaatitaanerat pillugu paasisutissat erseqqinnerusut uani takuneqarsinnaapput; Inatsisartuni sulineq pillugu tusagassiortunut najoqqutassiaq, uani nassaassaassumi; www.ina.gl.

Siulittaasoqarfimmut allakkatigut saaffiginnissutit

Siulittaasoqarfimmut allakkat kingusinnerpaamik qulequttap oqaluserineqar-nissaa ullormik unnuamillu sioqqullugu tunniunneqarsimassaaq.

UNGALQ 4: ILEQQORISSAARNERMUT NAJOQQUTASSAT

1. Pulaartut, partiit sulisui atorfillillu qinnuivigineqarput eqqissisimasumik ileq-qorissaartumillu pissuseqaqqullugit ataatsimiittarfimmilu sulineq mianereq-qullugu.
2. Oqarasuaatit, qarasaasiat angallattakkat il.il. ataatsimiittarfimmi nipeqartin-neqassanngillat.
3. Ataatsimiittarfimmi pisariaqanngitsumik nipiliortoqaqqunagu ataatsimiit-tarfimmut isinnginnermi qaatiguut nasallu peereerneqassapput.
4. Pulaartut, partiit sulisuisa atorfillillu ataatsimiinnerit nalaanni matu majuar-tarfii eqqaaniittoq atorsinnaangilaat, tusarnaartulli eqqaanni matu atussa-vaat.
5. Inatsisartut ataatsimiinneranni pulaartut, partiini sulisut atorfilittallu tu-sarnaartut issiavianniissinnaapput, ataatsimiittarfimmi issiavinni tunorlarni imaluunniit tusarnaartut inaanni issiavinni qullarni.
6. Imeruersaatit nerisassallu ataatsimiittarfimmut nassaqqusaanngillat aam-malu imertoqaqqusaanngilaq nerisoqaqqusaananilu.
7. Ataatsimiinnerit nalaanni Inatsisartunut ilaasortat imermik imigassaqartar-put aammalu Inatsisartut kaffisortarfiat quleriit allersaaniittoq atorsinnaal-lugu.
8. Tusarnaartut sineqqusaanngillat, tusarnaartullu inaannit nipituumik oqalun-nissaq, suaartarnissaq, ersartaannissaq assigisaallu inertequtaapput.

9. Avataaneersut tamarmik politikkerinut ataatsimiittarfimmiittunut saaffiginninniarunik (pulaartut, partiit sulisui atofillilluunniit saaffiginninniarunik) betjenti isertarfiup eqqaani issiasoq aqutugalugu saaffiginnissapput, taassumalu allagaq oqariartuut, pappilia atortussaq imaluunniit oqaloqatiginninnissamik qinnuiviginninneq ilaasortamut anngutissavaa oqaloqatigiinnerlu tusarnaartut inaanni ataatsimiittarfiulluunniit silataani pisinnaavoq.
10. Kikkulluunniit ataatsimiittarfimmi angalaarlutik assileerusuttut taamaaliunginnerminni ataatsimiinnermik aqutsisumut saaffiginnissapput akuerineqarnissamillu qinnuteqarlutik.
11. Ataatsimiittarfimmi arpattoqaqqusaanngilaq.
12. Inatsisartut ataatsimiittarfianni nasaqartoqaqqusaananilu assingusumik atuisoqaqqusaanngilaq.
13. Ataatsimiinnermik aqutsisup ataatsimiittarfimmi oqallinnermik malinnaanis-saa pissutugalugu Inatsisartunut ilaasortaangitsut aqutsisumut saaffigin-ninneri tamarmik betjenti aqutugalugu pisassapput.
14. Oqaluttarfimmit oqaaseqartoq ataatsimiinnermik aqutsisuunngitsumit akor-nuserneqanngilluinnassaaq.
15. Ataatsimiinnermik aqutsisup eqqissisimaqqusinera ileqqorissaaqqusinalu malitsinniarlugu betjenti qaqugukkulluunniit ikiutissaaq, betjentillu peqqu-sinera tusarnaartut malissavaat.

5

Ataatsimiititaliat

Inatsisartut ataatsimiititalianik tunngavimmikkut assigiinngitsunik pingasunik pilersitsisinnaapput. Tassalu ataatsimiititaliat inatsisit naapertorlugit pilersinneqartussat, ataatsimiititaliat ataavartut suliassaqarfinnik aalajangersimasunik isumaginnittussat pilersinneqarsinnaapput, kiisalu ataatsimiititalianik suliassanik aalajangersimasunik suliagarasuartussanik pilersitsisinnaallutik. Suleriaaseq mallillugu ataatsimiititaliat uku inatsisit naapertorlugit pilersinneqassapput: Nunanut Allanut Sillimaniarnermullu Ataatsimiititaliaq, Qinigaanerup Misilinneqarnissaanut Ataatsimiititaliaq, Inatsisinut Ataatsimiititaliaq, Aningaasaqarnermut Ataatsimiititaliaq kiisalu Kukkunersiuinerumut Ataatsimiititaliaq.

Ataatsimiititaliat aallaavittut tallimanik ilaasortaqaqartaput.

Immikkulli pisoqartillugu Inatsisartut Siulittaasoqarfiat inassuteqarsimatillugu ataatsimiititaliamut ilaasortat arfineq-marlunngorlugit amerlineqarsinnaapput. 2011-mi ataatsimiititalianut ilaasortat tallimaniit arfineq-marlunnut amerlineqarsinnaalermata tamatuma Inatsisartuni ataatsimiititaliaq aqqaneq marlunniit tallimangortillugit kattutsinneqarnerannut atatillugu atorneqarnissaa isumaliutiginneqarsimavoq.

Pilersitsineq

Ataatsimiititaliat tamarmik Inatsisartunit ataatsimiittarfimmi ataatsimiinnermi pilersinneqartaput. Ataatsimiititalianut ilaasortassanik sinniisussanillu qinersineq oqaluuserisassani imm. 4-mi pisarpoq. Ataatsimiititaliat ataasiakkaat qaqugu pilersinneqarnissaat aallaavittut suleriaatsimi aalajangersarneqarpoq. Ataatsimiititaliat tamarmik inassitsiterfiusumik ataatsimiinnermi pilersinneqartaput. Tamatuma kingorna Inatsisartut ukiuini tamani ukiakkut ataatsimiinnerni Nunanut Allanut Sillimaniarnermullu Ataatsimiititaliaq, Qinigaanerup Misilinneqarnissaanut Ataatsimiititaliaq, Inatsisinut Ataatsimiititaliaq kiisalu ataatsimiititaliat ataavartut pilersinneqartaput, Aningaasaqarnermullu Ataatsimiititaliaq Kukkunersiuinerumullu Ataatsimiititaliaq upernaakkut ataatsimiinnerni pilersinneqartarlutik.

Ataatsimiititalianik pilersitsineq taamaalillunilu ataatsimiititaliani ataasiakkaani ilaasortassanik qinersineq qinerseqatigiittartut inassuteqarneri tunngavigalugit pisarpoq. Aallaavittut isigalugu partiit, kattusseqatigiit, attaviitsullu ataasiakkaat tassaapput qinerseqatigiittartut. Partiit, kattusseqatigiit attaviitsullu ataasiakkaat qinersisarneq pillugu suleqatigiinnissamik isumaqatigiissuteqarsinnaapput taamaalillutillu qinerseqatigiittartunngorlutik anginerusq. Suleqatigiinneq taamaattoq ataatsimiittarfimmi ataatsimiinnginnermi Inatsisartut Siulittaasoqarfiannut nalunaarutigineqassaaq. Tamatuma saniatigut qinerseqatigiittartut ataasiakkaat ataatsimiititaliani ilaasortaataitaqarfissaminni ataasiakkaani ilaasortaattinniakkatik Siulittaasoqarfimmuut nalunaarutigissavaat.

Qinerseqatigiittartut ataasiakkaat ataatsimiititaliami ilaasortaataitaqarfimmini ilaasortaataitaasa amerlassusiat d'Hondtip perusia naapertorlugu agguataarneqartaput. Qinerseqatigiittartut ataasiakkaat ilaasortaasa amerlassusii kisisimik agguataasumik 1-imik, 2-mik, 3-mik, 4-imik, 5-imik il.il. agguarneqassapput; tassa imaappoq ataatsimiititaliami pineqartumi ilaasortaasussat amerlassusisaat naammatsillugit. Taamaaliornikkut agguakkat inerneru arlallit anguneqassapput. Agguaanerit inerneru anginerit tallimat tamarmik immikkut ataatsimiititaliami inissamik ataatsimik naleqarput - ataatsimiititalianut arfineq marlunnik inutta-

linnut aggornilersuinermi inernerit anginerpaat arfineq marluk atorneqassapput. Aallartitanut tunngatillugu, aallartitat peqataasut katillutit qanoq amerlatigine-
rat najoqqutaralugu periuseq taanna aamma atorneqartarpoq. Tamanna aamma
Naalagaaffiit Peqatigiit ataatsimeersuarnerannut aallartitat eqqaassanngikkaan-
ni aallartitanut atuuppoq, tak. kapitali 6. Ilaatigut Nunat Avannarliit Killiit Siunner-
suisoqatigiiffiannut tunngatillugu D*Hondt periusia atorneqartarpoq – tamatu-
manili Inatsisartut Siulittaasuata siulittaasutut inissisimasarnera ileqquuvoq.
Qinerseqatigiittartut arlallit assigiimmik kisitsisitalimmik angusaqarpata ataat-
simiititaliami ilaasortatut inissaq makitsinikkut inuttalerneqassaaq. 2018-imi
inissititerfiusumik ataatsimiinnermi partiit ilaasortaataaasa agguataarsimanerat
matuma kinguliani assersuutitut takussutissiarineqarpoq.

TAKUSSUTISSIAQ 1

Ataatsimiititaliani inissat agguataagaanerat – qinersisarneq pillugu suleqatigiin-
nissamik isumaqatigiissuteqartoqarsimatillugu

		Kisitsisit agguaatit						
Qinerseqatigiit- tartut	Ilaasortat	1	2	3	4	5	6	7
S+N+A+NQ	16	16,00	8,00	5,33	4,00	3,20	2,67	2,29
D+SA+IA	15	15,00	7,50	5,00	3,75	3,00	2,50	2,14

Aggornerit **erseqqissakkat** tassaapput ataatsimiititaliami inissat tallimat siulliit.
Aggornerit **uingatillugit ersarissaasikkat** tassaapput ataatsimiititaliaq arfineq
marlunnik inuttaqarsimappat inissat kingulliit marluk.

TAKUSSUTISSIAQ 2

Ataatsimiititaliami inissat agguataagaanerat – qinersisarnermi suleqatigiinnissa-
mik isumaqatigiissuteqartoqarani

		Kisitsisit agguaatit						
Qinerseqatigiit- tartut	Ilaasortat	1	2	3	4	5	6	7
S	9	9,00	4,50	3,00	2,25	1,80	1,50	1,29
IA	8	8,00	4,00	2,67	2,00	1,60	1,33	1,14
D	6	6,00	3,00	2,00	1,50	1,20	1,00	0,86
PN	4	4,00	2,00	1,33	1,00	0,80	0,67	0,57
A	2	2,00	1,00	0,67	0,50	0,40	0,33	0,29
SP	1	1,00	0,50	0,33	0,25	0,2	0,17	0,14
NQ	1	1,00	0,50	0,33	0,25	0,20	0,17	0,14

Aggornerit **erseqqissakkat** tassaapput ataatsimiititaliami inissat tallimat siulliit.
Aggornerit **uingatillugit ersarissaasikkat** tassaapput ataatsimiititaliaq arfineq
marlunnik inuttaqarsimappat inissat kingulliit marluk.

Takusutissiaq 2-mi takuneqarsinnaasutut qinersisarnerit eqqarsaatigalugit suleqatigiinnissamik isumaqatigiissuteqarsimasut arlallit aggnorsorneri assigiis-sinnaasarpot. Taamak pisoqartillugu ataatsimiititaliamut ilaasortassaq kingulleg makitsinikkut toqqarneqartarpoq.

Ataatsimiititalianut tallimanik ilaasortalinnut ilaasortat tallimassaannik toqqaanermi aggnorsorsuinerimi "4,00"-imik nalunaarsorneqartut akornanni makitsisoqartariaqassaaq (IA aamma PN).

Ataatsimiititalianut arfineq marlunnik ilaasortalinnut ilaasortat arfineq-marlussaannik toqqaanermi aggnorsorsuinerimi "3,00"-imik nalunaarsorneqartut akornanni makitsisoqartariaqassaaq (S aamma D).

Inissitsiterneq

Ataatsimiititaliat ataasiakkaat pilersinneqarnermik kinguninnguatigut inissitsitertarput. Ataatsimiititaliat ullormi pineqartumi Inatsisartut ataatsimiittarfianni ataatsimiinnerup naammassinerata kinguninnguatigut nalinginnaasumik inissitsitertarput. Suleriaatsimi § 11, imm. 1 naapertorlugu ataatsimiititaliap inissitsiterfiusumik ataatsimiinnerani siulittaasooq siulittaasullu tullia toqqarneqartarput. Taamaalillutik qinerseqatigiittartut anginerit ataatsimiititaliamut ilaasortat akornanni siulittaasumik toqqaasarpot. Ataatsimiititaliap siulittaasuata tullia qinerseqatigiittartunit anginerpaanut tulliusunit ilaasortat akornanni toqqarneqartarpoq. Siulittaasutut siulittaasullu tulliatut toqqarneqartut qinerseqatigiittartunut toqqaasusunut ilaasortaasariaqanngillat ataatsimiititaliamulli ilaasortaasusaallutik.

Ataatsimiititaliat Inatsisartut ataatsimiittarfianni ataatsimiinnerup ilaasortasanillu qinersinerup kinguninnguatigut inissitsiterfiusumik ataatsimiinneri tamar-mik minutsinit marlussunnit sivisuneruneq ajorput pilersaarullu ataatsimiititaliat Inatsisartut ataatsimiittarfianni pilersinneqarneranni Inatsisartut Allattoqarfian-nit ilaasortanut agguanneqartoq malittarlugu.

Siunertat suliassa qarfiillu

Ataatsimiititaliat siunertaat Suleriaatsimi § 14-imi nassuiarneqarput. Ataatsimiititaliat ataavartut inatsisillu naapertorlugit pilersinneqartussat ataasiakkaarlutik suliassa qarfimmini makkuninnga suliassa qarput:

- siunnersuutunik Inatsisartunit ataatsimiititaliamut suliassanngorlugit inner-suussanik suliarinnittarneq – tassa isumaliutissiissusiorneq
- suliassa qarfimmi iluani ingerlatsinerup ineriartorneranik malittarinninneq
- Naalakkersuisut inatsisitigut killissarititit iluanni ingerlatsinikkulluunniit ileqqorissaarnermut tunngatillugu killigititit iluanni ingerlatsinerat nakkuti-gissallugu

Siunertat taakku saniatigut Aningaasaqarnermut Ataatsimiititaliaq, Nunanut Allanut Sillimaniarnermullu Ataatsimiititaliaq, Kukkunersiuiner-mut Ataatsimiititaliaq kaisalu Inatsisinut Ataatsimiititaliaq inatsisit naapertorlugit ataatsimiititaliatut atuuffeqarnertik naapertorlugu immikkut ittunik arlalinnik suliassa qarput.

Ataatsimiititaliat ataasiakkaarlutik immikkut arlalinnik suliassaqarfeqarput, taakkulu pingaarnersiorlugit nassuiarneqarput. Ataatsimiititaliat ataavartut ataatsimiititaliallu inatsisit naapertorlugit pilersinneqartussat aallaavittut arlalinnik suliassaqarfeqartut ataatsimiititaliat sulinasuartussat aallaavittut suliassamik aalajangersimasumik suliaqartussanngorlugit pilersinneqartarput. Ataatsimiititaliat inatsisit naapertorlugit pilersinneqartut suliassaqarfiisa agguataagaanerat ilaatigut Suleriaatsikkut aalajangersagaapput. Suliassaqarfiit sinnerisa agguataagaanerannut Inatsisartut sulinerisa inerneru tunngaviupput, taakkununga ilaallutik siunnersuutit piffissap ingerlanerani Inatsisartunit ataatsimiititalianut suliassanngorlugit innersuunneqartarput.

Ataatsimiititaliat ataasiakkaat siunertaat suliassaqarfiilu uani takuneqarsinnaapput; www.ina.gl.

Ataatsimiititaliap Siulittaasuata atuuffii

Ataatsimiititaliat inissitsiterneranni ataatsimiititaliap siulittaasuani siulittaasuatalu tullianik toqqaasoqartarpoq. Siulittaasup najuussinnaannginnerani siulittaasup tulliaata taarsertarpoq.

Ataatsimiititaliap Siulittaasua partiilersorfiummikkut tatigisatut toqqakkatut ataatsimiititaliamut siulittaasuvoq. Ataatsimiititaliap Siulittaasua ataatsimiititaliap avammut sinniisoraq, tamanna ilaatigut Naalakkersuisut, tusagassiorfiit inuiaqatigiillu tunngaanut.

Ataatsimiititaliap Siulittaasua ataatsimiititaliap suliassaminik isumaginninnerannut pingaarnertut akisussaasuvoq.

Ataatsimiititaliami sulinerup ataatsimiititaliami sulinermut killiliussatut malittarisassanik malinnilluni ingerlanneqarnera ataatsimiititaliap Siulittaasuani

- ataatsimiititaliap allatseqarfianit siunnersorneqarlunilu ilitersuunneqartumit
- qulakkeerneqassaaq.

Siulittaasup pingaarnertut suliassaa Suleriaatsimi § 11, imm. 2-mi aalajangersagaavoq – tassalu ataatsimiititaliap suliaani siuarsaanissaq. Ataatsimiititaliap siulittaasuata suliassaa pingaarneq tassaavoq ataatsimiititaliap ataatsimiinnerini aammalu ataatsimiititaliap angalanerini pulaarnerinilu aallartitanut aqutsisuuneq. Ataatsimiititaliap suliassaasa naammassineqarnissaat, ataatsimiititaliallu ingerlataanik nakkutiginninneq siulittaasup isumagisassara.

Ataatsimiititaliap sinnerlugu allakkiat assigiinngitsut ataatsimiititaliap siulittaasuani atsiorneqartarput – tamanna naak immaqqa imarisat pillugit ataatsimiititaliami tamakkiisumik isumaqatigiittoqanngikkaluartoq. Taamaalluni siulittaasoq ataatsimiititaliamut tamarmut siulittaasuvoq ataatsimiititaliallu suliaani ataqatigiissaarisuulluni, naalakkersuinikkut inissisimaffik apeqquataatinnagu.

Ataatsimiititaliap Siulittaasua ataatsimiititaliap sulinerata ingerlanera pillugu oqaatsitigut allakkatigullunniit ilisimatitseqqullugu Inatsisartut Siulittaasuani peqquneqarsinnaavoq.

Ataatsimiititaliap siulittaasuata suliata qulaani pineqartut pillugit ataatsimiititaliap allatseqarfianik ingerlaavartumik oqaloqateqartarnissaa naatsorsuutigineqarpoq.

KAPITALI 5

Ataatsimiititaliap Siulittaasuata atuuffii pilugit paasisaqarnerujumalluni Ataatsimiititalianut ilitersuut takuneqarsinnaavoq

Ataatsimiititaliap allatseqarfia

Ataatsimiititaliat tamarmik allatseqarput oqalutseqarlutillu. Maannakkut allat-taasut oqaluttaasullu pillugit nalunaarsuiffik uani takuneqarsinnaavoq; **www.ina.gl**. Naak ataatsimiititaliap siulittaasua allatseqarfimmik qaninnerpaamik suleqatiginnittuugaluortoq ataatsimiititaliap allattaa suliat pillugit ilisimasanik ataatsimiititaliamut ilaasortanut tamanut siunnersuinissamut piareersimavoq – tamanna aamma Inatsisartunut ilaasortanut allanut suliassaqarfik pillugu soqu-tigisaqartunut atuuppoq. Taamaattorli ataatsimiititaliap allatseqarfia naalakker-suinikkut periutsit naalakkersuinikkullu aalajangiinissat allat pillugit siunnersui-neq ajorpoq.

Ataatsimiititaliap allattaa Inatsisartut Suleriaasiat naapertorlugu sulivoq – taa-maalillutillu siunnersuutit ataatsimiititaliamut suliassanngorlugit innersuunne-qartut pingaarnersuineri salliutinneqartarput. Tamatuma nassatarisaanik iliuu-sissat allat soorlu ataatsimiititaliap angalanissai sammisassallu allat Inatsisartut ataatsimiinneranni sulineriut toqqaannartumik attuumassuteqanngitsut isuma-liutississusiornermut sanilliullugit tunullinneqarsinnaapput. Tamatuma ataatsi-miititaliamut akuersaartumik pissuseqarfigineqarnissaa naatsorsuutigineqarpoq.

Aallaavittut isigalugu atortussat ataatsimiititaliamut nassiuunneqartut ataatsi-miititalialluunniit allatseqarfianit suliarineqartut tamarmik ataatsimiititaliap allattaanit ataatsimiititaliap ilaasortanut tamanut sapinngisamik ataatsikkut nassiuunneqartarput. Saaffiginnissutaasinnaasut ilaasortanit tiguneqartut ataatsi-miititaliamillu tamarmiusumit suliarineqartussatut kissaatigineqartut, ilaatigut nalunaarsuinissaq eqqarsaatigalugu ataatsimiititaliap allatseqarfianut nassiu-neqartariaqartut.

Ataatsimiititalianut allatseqarfiit piffissami atuuttumi suliassaat pillugit erseq-qinnerusumik paasisuttissat uani nassaarineqarsinnaapput; **Inatsisartut Allatto-qarfiat – suliassat allattorsimaffiat**.

Ataatsimiititaliap ataatsimiinnera

Ataatsimiititaliat ataatsimiinneri tamarmik oqaluuserisassat siumungaaq ag-guaanneqarsimasut naapertorlugit pisarput. Ataatsimiititaliap ataatsimiinnera sapinngisamik pitsaasumik sukumiisumillu ingerlanneqarsinnaaqqullugu oqaluu-serisassat taakkulu imarisaat ilanngussat ilanngullugit ataatsimiititaliamut ilaasortanit sukumiisumik misissoreerneqarsimallutillu malinneqarnissaat pingaaruteqarpoq. Taamaaliornikkut oqallisigisani pingaartinneqartut inernilii-nerillu pillugit isumaqatigiinnissaq ataatsimiititaliap ilaasortaanut kiisalu ataatsimiititaliap aalajangiussaanic allatseqarfiup malitseqartitsinissaa ajor-nannginnerusaaq. Ataatsimiinnerni oqallinnerit pisariaqanngitsumik uteqattaarifi-fuler-pata, naammassisaqarfiunngippata sammisarluunniit piunnaarlugu allamut saaqattaarfiuppata ataatsimiititaliap siulittaasua akuleruttariaqarpoq.

Oqaluuserisap naammassinerani ataatsimiinnermik aqutsisup inaarutaasumik aalajangiussaq imaluunniit inernilii-neq pillugu naatsumik eqikkaasarnera ileq-quuvoq pitsaasoq. Tamanna naalakkersuinikkut aalajangiussat malitseqartinne-

qarnissaat qulakkeerniarlugu taamatullu allatsi ataatsimiititaliap oqallisigisaani aalajangiussat pillugit imaqarniortoq eqqarsaatigalugu.

Ataatsimiititaliamut ilaasortat tamarmik ataatsimiinnermi atortussanik qarasaasiakkoorlugu nassinneqartarput mailikkullu ataatsimiinnissap inniminnerneqarnera pillugu nalunaarfigineqartarlutik. Siulittaasup ataatsimiititaliallu allattaata ataatsimiititaliap suliaanik nakkutiginnissinnaaner at eqqarsaatigalugu ataatsimiititaliamut ilaasortat kaammattorneqarput qarasaasiakku at ataatsimiigiaqqussutit akuerinerlugit/itigartinneqarput mailikkut nalunaartaqqullugit. Inatsisartut ataatsimiinnerisa nalaanni ataatsimiititaliap ataatsimiinneri ataatsimiititaliat ataatsimiittarfiini pisarput. Inatsisartut ataatsimiinnerisa avataasigut ataatsimiititaliat ataatsimiinneri nalinginnaasumik oqarasuaatikkooorlugu pisarput. Ataatsimiititaliat ilaat aalajangersimasumik akuttussuilimmik ataatsimiittarput, allalli pisariaqartitsineq naapertorlugu ataatsimiittarlutik. Ataatsimiititaliap ataatsimiigiaqquneqarnissaanik ilaasortat arlaat kissaateqaruni, ilaasortaq tamanna pillugu ataatsimiititaliap siulittaasuanut allattaanulluunniit saaffiginnissinnaavoq. Taamatut kissaateqarnerup ataatsimiititaliamut ilaasortat sinnerinit itigartinneqanngisaannarnissaa kaammattuutigineqarpoq, tamatumunnga ilanngullugu oqaluuserisassanut immikkoortumik ilanngussinissamik kissaateqarnermut, tamanna suliap oqallisiginissaa ajornanngippat.

Nalinginnaasumik nalunaaquttap akunnerani ataatsimi ataatsimiinnissamut piffissaliisoqartarpoq, tamannalu eqquutsinniarneqartariaqartarpoq, tassami ataatsimiititaliat allat kingunitsiaatigut ataatsimiittussaasinnaasarmata. Ataatsimiinnerit nalunaaquttap akunneranit ataatsimit siviuserusussatut pilersaarutigineqartut, oqalutsi eqqarsaatigalugu minutsit 45-t ingerlareerneranni unillatsiarfiusassapput. Tamanna aamma ataatsimiinnernut sivitsortoortunut atuuppoq.

Ataatsimiititaliamut ilaasortaq ataatsimiititaliap ataatsimiinnissaanut pilersaarutigineqartumut peqataasinnaanngikkuni nammineerluni sinniisussami aggersarneqarnissaanut ataatsimiinnermilu atortussanik tunineqarnissaanut akisussaasuvoq. Maluginiaqquneqarpoq ataatsimiititaliami pineqartumi sinniisussamik aggersaasarnermut immikkut maleruagassaqarsinnaammat – tamanna ilaatigut ataatsimiititaliap suleriaasiani allassimassaaq. Sinniisusaaq peqataasinnaanngippat partii/kattusseqatigiit /attaviitsoq immikkut sinniisuliinissamik Siulittaasoqarfimmu qinnuteqarsinnaavoq.

Ataatsimiititaliaq "qaammatisiummik ukiumoortumik" assingusumilluunniit atuilluni suliassaminik pilersaaruserluarsinnaavoq – tamanna ataatsimiititaliap siulittaasuata allatsillu ataatsimiititaliap suliaanik tamanik nakkutiginnissinnaaner at malitseqartitsarnissaallu qulakkeerniarlugit.

Ataatsimiititaliap sakkussai

Ataatsimiititaliaq arlalinnik atorsinnaasaminik sakkussaqqarpoq, taakku matuma kinguliani nassuaatigineqarput. Peqatigisaanik Inatsisartunut ilaasortat tamarmik partiillu allatseqarfii Inatsisartut Allattoqarfiata qarasaasiakkoorlugu allaqaateqarfianut ugguaana isersinnaapput; intra.ina.gl.

Ataatsimiititaliamut aningaasartuuteqarfiusumik sammisaqarluni iliuseqarnernermut, Inatsisartut Siulittaasoqarfiannut sioqqutsilluni aningaasanik

KAPITALI 5

atuisinnaanermut qinnuteqartussaaneq ataatsimiititalianut tamanut atuuppoq. Aningaasanik atuisinnaanermut ilaatigut piumasagaataavoq iliuseriniarneqartup ataatsimiititaliap siunertaanut suliassaqarfianullu attuumassuteqartussaana. Ataatsimiititaliat tamarmik, ataatsimiititaliap qanoq tunngaveqarnera qassinillu ilaasortaqarnera apeqqutaatillugit aningaasanik aalajangersimasumik amerlassusilinnik siumungaaq atugassinneqartarput. Tamatumani pineqarput aningaasat aalajangersimasumik amerlassusillit qinnuteqarfigineqarsinnaasut – ataatsimiititaliap aningaasat pineqartut tamaviisa atornissaannik imaaliinnarluni piumasagaateqarsinnaangilaq. Ataatsimiititalianut ataasiakkaanut missingersuutit ukioq aningaasaliiffiusoq malippaat, aningaasartuutillu ukioq aningaasaliiffiusumi sammisanut atorneqartariaqarput. Ukioq aningaasaliiffiusumiit ukioq aningaasaliiffiusumut allamut aningaasanik nuussisoqarsinnaangilaq. Taamaalilitik aningaasat atorneqanngitsut ileqqaarutigineqarsinnaangillat.

Isumaliutissiissut

Ataatsimiititaliat Inatsisartut inatsisissaattut siunnersuutini imaluunniit aalajangiiffigisassatut siunnersuutini ataatsimiititaliamut sulassanngorlugit innersuunneqarsimasunik suliarinninnertik pillugu isumaliutissiissutikkut nassuiaateqartarput. Siunnersuut Inatsisartunit ataatsimiititaliamut sulassanngorlugu innersuunneqarpat, taanna pillugu isumaliutissiissuteqarnissani ataatsimiititaliap pisussaaffigaa. Isumaliutissiissutip imarisarpari siunnersuutip kingunissaanik ataatsimiititaliap misissuisimasinnaanera, naalakkersuunik isumaliutigisai kiisalu inaarutaasumik Inatsisartunit inassuteqataa. Inassuteqaatikku siunnersuutip allannguutissatullu siunnersuutaasimasinnaasut akuersissutigineqarnissaanik/itigartinneqarnissaanik Inatsisartut kaammattorneqartarput. Ataatsimiititaliap isumaliutissiissummigut nammineq allannguutissatut siunnersuumminik saqqummiussisinaavoq. Ataatsimiititaliap isumaqatigiittoq inassuteqarsinnaavoq, ataatsimiititaliarluunniit arlariinnut (amerlanerussuteqartunut ikinnerussuteqartunullu) avilluni inassuteqarsinnaalluni. Siunnersuummik suliarinninnermi inassuteqaataasinnaasut pillugit kapitali “Inatsisartut ataatsimiinnerat” takuuk. Siunnersuut ataatsimiititaliap isumaliutissiissuteqareerneratigut Inatsisartunit suliassanngorlugu ataatsimiititaliamut innersuussutigineqarqippat, ilassutitut isumaliutissiissuteqarnissaq ataatsimiititaliap pisussaaffigaa. Innersuusseqqineq allannguutissatut siunnersuutaasimasinnaasunik imaluunniit paasissutissanik attuumassutilinnik nutaanik saqqummertunik suliarinninnissamik kissaateqartoqarneranik tunngaveqakkajuppoq.

Sassartitaqarneq

Immikkoortoq **Avataaniit ataatsimiititaliamut saaffiginnissutit** takuuk.

Tusarniaaneq

Inatsisissatut siunnersuutit tamarmik Inatsisartunit ataatsimiittarfimmi oqaluserineqannginnerminni aallaavittut siunnersuuteqartumit tusarniaassutigineqareersimasarput. Tusarniaaneq tamakkiisuunngitsumik ingerlanneqarsimasoq Inatsisartunit nalillerneqarpat ataatsimiititaliap inatsisissatut siunnersuummik suliarinnittussanngorlugu innersuussivigineqartup nutaamik tusarniaassutiginnissamik sulissuteqartarnera ileqquuvoq. Allakkatigut tusarniaaneq nukippassuarnik atuiffiusarmat aallaavittut Naalakkersuisut tusarniaaqqullugit

ataatsimiititaliamit qinnuigineqartarput. Ataatsimiititaliarli suliassaqarfimmini nammineerluni sammisaq tamanut attuumassutilik pillugu tusarniaasinnaavoq. Taamaattorli tusarniaaffigineqartut isummersuutiniq saqqummiussinissamik ataatsimiititaliamit peqquneqarsinnaanngillat. Ataatsimiititaliat tusarniaasarnerat qaqutigoorpoq, tamatumanimi piumasaqaataammat aningaasanik atuisinnaanermut Siulittaasoqarfimmu siumut qinnuteqareersimanissaq, tamatumani aamma ataatsimiititaliap allatseqarfiani nukissat killeqarnerat eqqarsaatigalugu.

Ilisimatitsiffiusumik ataatsimeeqateqarnerit pulaarnerillu

Illuatungerisanik attuumassuteqartunik ilisimatitsiffiusumik ataatsimeeqateqarnerit taamatullu paasisassarsiorluni pulaarnerit ataatsimiititalianit ataasiakkaanit ilisimasanik sammisamut attuumassutilinnik pissarsiniarfittut atorineqartarput. Ataatsimiititaliat illuatungerisanik avataaneersunik imaluunniit Naalakkersuisunik ilisimatitsiffiusumik ataatsimeeqateqarsinnaapput. Ilisimatitsiffiusumik ataatsimeeqateqarnerit/paasisassarsiorluni pulaarnerit ataatsimiititaliat ataatsimiittarfiini imaluunniit illuatungerisani avataaneersuni pisinnaapput, assersuutigalugu ataatsimiititaliap paasisassarsiorluni angalanerani.

Ilisimatitsiffiusumik ataatsimeeqateqarnerit pulaarnerilluunniit ataatsimiititaliap imaluunniit illuatungerisap avataaneersup qinnutiginninneratigut pisinnaapput. Ataatsimiinnerni taamaattuni qulequtarineqakkajuttut tassaasarpud Namminersorlutik Oqartussat suliffeqarfutaanni periusissiat, peqatigiiffiup atuuffia, paasisitsiniaanerup imarisai il.il. Ataatsimiinnerit taamaattut amerlasuutigut sassartitaqarnernit siunersiuinernillu persuarsiorpalaannginnerusarput.

Siunersiuinerit

Siunersiuineq tassaavoq sammisaq apeqqulluunniit aalajangersimasoq siumut paasisutissiissutigineqareersoq pillugu Naalakkersuisumik Naalakkersuisunilluunniit arlalinnik ataatsimeeqateqarneq. Naalakkersuisunut ilaasortamik siunersiuinermut aggeqqusinissaq ataatsimiititaliamut ilaasortap kialuunniit siunnersuutigisinnaavaa. Naalakkersuisoq aggersarneqartoq siunersiuinermut peqataasussaatitaavoq, taannalu atorfilittamik ataatsimik ingiallorteqarsinnaavoq. Ataatsimiititaliarli Naalakkersuisup pineqartup atorfilittanik arlalinnik ingiallorteqarsinnaanerani akuersinnaavoq. Naalakkersuisunulli ilaasortaq tamanna pillugu siumut ataatsimiititaliamut qinnuteqassaaq. Naalakkersuisup aggersarneqartup atorfilittaminik attuumassuteqartut pillugit oqaaseqarsinnaatitsisarnera nalinginnaasuvoq. Naalakkersuisunulli ilaasortaq atorfilittap peqataasup oqaaseqaataanut akisussaasuvoq – taamaallutik atorfilittanit oqaaserineqartut Naalakkersuisut akisussaanerannik tunngaviusut naapertorlugit Naalakkersuisup aamma akisussaaffigai.

Siunersiuinerit ataatsimiititaliat ataatsimiittarfiini nalinginnaasumik ingerlanneqartarput. Ataatsimiititaliamut ilaasortat siunersiuinerup aallartinginnerani ataatsimiittarfimmeereertariaqarput Naalakkersuisumillu atorfilittaanillu tikilluaqqusinissaminut piareersimallutik. Ataatsimiititaliamut ilaasortat ataatsimiititaliallu allatseqarfianeersut Naalakkersuisoq iserpat nikuissapput tikilluaqqullugulu.

Naalakkersuisup aggersarneqarsimasup apeqqutinut ataatsimiititaliamit siumut

nassiunneqarsimasunut akissutissani oqaasissanut najoqqutassiami allassimasut saqqummiutissavai. Qanoq annertutigisumik saqqummiussinerup ingerlanerani ataatsimiititaliap apeqquqteqarsinnaanera imaluunniit aatsaat najoqqutassiaq siuliani oqaatigineqartoq malillugu saqqummiussinerup naammassinerani apeqquqteqartoqassanersoq siumut isumaqatigiissutigineqartarpoq. Naalakkersuisunut ilaasortap ataatsimiititaliallu akornanni oqallisiginninissaq/qulaajaanissaq siunersiuinerup siunertarimmagu, tamanna apeqqutinik teknikimut tunngangginerusunik sammisaqarnissamut tulluarneruvoq.

Siunersiuinerit ileqqusoq malillugu matoqqasususarput, taamaattorlu Suleriaaseq ammasumik siunersuisinnaanermik periarfissiivoq – tassa kikkut tamat peqataasinnaatillugit

Uani paasisaqarnerugit: <https://ina.gl/udvalg/>

Naalakkersuisunut allakkatigut apeqqutit

Assersuutigalugu suliassaqarfimmuni ineriartornermik nakkutiginnikkumalluni Naalakkersuisullu inatsisunik atuuttunik ingerlatsinerannik nakkutiginnikkumalluni malinnaajumallunilu ataatsimiititaliaq Naalakkersuisunut allakkatigut qaquguk-kulluunniit apeqquqteqarsinnaavoq. Ataatsimiititaliap apeqquqtaí Naalakkersuisunit akineqartussaaitaapput. Pisortalli namminersortulluunniit soqutigisaasa pingaaruteqarnerunerat pissutigalugu ataatsimiititaliap soqutigisai tunulliuqqartariaqarpata, ataatsimiititaliap paasisutissanik pissarsisinnaanera Naalakkersuisunit killilerneqarsinnaavoq. Naalakkersuisut killiineq taamaattoq allakkatigut tunngavilersussavaat.

Ataatsimiititaliap Naalakkersuisunik nakkutilliusaataitanera namminerlu suliassaqarfimmuni ineriartornermik malinnaasussaataitanera tunngavigalugit nalinginnaavoq ilaasortap kialuunniit inatsisit atortinneqarneranni pissutsinik maanna atuuttunik, taakkuluunniit qanoq paasineqarnerisa qulaajaavigineqarnissaannik pisariaqartitsisup ataatsimiititaliaq aqqutigalugu Naalakkersuisumut attuumassuteqartumut apeqquqteqarsinnaanera. Naak immaqa tamanna sammisaq pillugu qulaajaanissaq ilaasortanit tamanit pisariaqartinneqanngikkaluartoq. Inatsisartunut ilaasortat tamarmik namminee lutik (§ 37 naapertorlugu) Naalakkersuisunut apeqquqteqarsinnaagaluarput, paasisutissalli attuumassutillit tamarmik ataatsimiititaliamut tunniunneqarnissaat ataatsimiititaliamit erseqqilluinnartumik soqutigineqarpoq.

Ataatsimiititaliat angalaneri

Ataatsimiititaliat ataatsimiititaliatut angalanissaminnut periarfissaqarput – tassa paasisassarsiorlutik nunatsinni nunaniluunniit allani angalasinnaallutik. Aallaavittut isigalugu ataatsimiititaliat Inatsisartut ataatsimiinnerisa nalaanni angalaqqusaanngillat. Ataatsimiititaliat angalaneri ataatsimiititaliap allattaanit ataqatigiissaarneqartarput. Ataatsimiititaliap allattaa ataatsimiititaliap angalanissaanik pilersarusiorsinnaassappat, ilaasortat angalanermi kikkut suullu tikeraarnissaannik kissaatiminnik, tassungalu ilanngullugu tikeraarnissap siunertaanik erseqqissumik saqqummiussinissaat pisariaqarpoq. Bilitsinik iniminniineq, assigiinngitsunut isumaqatigiissuteqarneq il.il. suliapput piffis-sartornartut nalinginnaasumillu Inatsisartut ataatsimiinneranni allatseqarfittut

suliassat isumagiutigalugit naammassiuminaatsut. Angalanermut pitsaasumut pissarsiaqarfiulluartumullu piumasaaqatit immikkoortumi uani takukkit; **Siunner-suutit ataatsimiititaliani sulinermi iluaqutaasinnaasut.**

Ullormusiat, angalanermut naatsorsuutit il.il. pillugit paasissutissat mappersak-kami uani takukkit; **Aningaasarsiaqartitaaneq ineqartitaanerlu.**

Ataatsimiititaliap pineqartup angalanerani peqataanermut, sinniisussanik ag-gersaasarnermut il.il. malittarisassanik erseqqinnerusunik ataatsimiititaliat ataasiakkaat suleriaatsiminni aalajangersagaqarput.

Ataatsimiititaliap allattaa “angallassisutut” atuuppoq, taamaattorli assigiin-ngitsunik soorlu ullaakkut itersaanernik, pasinik, pappilianik, ataatsimiinnermi atorutussat assilinerinik, angalanermi nassatanik, qimatanik il.il. isumaginnittus-saatitaanani.

Ataatsimiititaliamut avataanit saaffiginnissutit

Ataatsimiititaliat arlallit qinigaaffiup ingerlanerani innuttaasunit, peqatigiiffin-nit il.il. saaffiginnissutinik ingerlaavartumik tigusaqartarput. Saaffiginnissutit ilisimatitsissutinik nassitsisup ataatsimiititaliap ilaasortaanut ilisimassallugit tulluartitaanik imaqarsinnaapput, aammattaarli ataatsimiititaliamit qisuariar-toqarnissaanik kissaateqarnermik imaqarsinnaallutik.

Ataatsimiititaliat sulianik ataasiakkaanut tunngasunik suliaqarneq ajorput

Tamatumani ataatsimiititaliat nunap inatsisiliortuisa ataanniinnerat, taamaat-tumillu ataasiakkaat pillugit sulianik, suliani aalajangiinernik assingusunillu suliaqartuunnginnerat erseqqissaatigissallugu pingaaruteqarpoq. Aallaavittut isigalugu tamakkuninnga suliaqartussaataitaasut tassaapput Naalakkersuisut, pissaaneramik atuutsitsisusut. Taamaalluni ataatsimiititaliaq saaffiginnissuti-nik tunngaviusutut isigineqarsinnaasunik taamaallaat suliaqarsinnaavoq. Ataatsimiititaliali suliamik aalajangersimasumik ingerlatsinissaq toqqarpagu saaffiginnittup tamatuma nassataanik kingusinnerusukkut Inatsisartut Ombuds-mandiannut naammagittaalluiteqarnissamut mattunneqarnissaa ataatsimiitia-liamut nassitsisumullu erseqqissaatigissallugu pingaartuuvoq.

Saaffiginnissut ataatsimiititaliamik naapitsinissamik kissaataappat sassartin-neqarnissamik qinnuteqaataagajuppoq. Sassartitaqarnermi sassartitaqartut assersuutigalugu kattuffik, innuttaasut ataatsimoortut assigisaalluunniit - paa-sissutissanik ataatsimiititaliamut ilisimasaqarfigissallugit soqutiginaateqartita-minnik saqqummiussissapput. Sassartitaqartut paasissutissanik saqqummius-sisarnerat kingornalu ataatsimiititaliamut ilaasortat qulaajaataasunik malitsitulluunniit apeqquteqartarnerat ileqquuvoq. Inuiaqatigiit akornanni soqutigisaqartunit paasissutissanik ataatsimiititalianut tunniussinissamut sassartitaqartarneq sakkussaavoq – taamaalluni sassartitsinerup qanorpiaq imaqarnissaa pinnagu sammisassap qulequtaa kisiat ataatsimiititaliap amerla-ner tigut ilisimasarpaa. Tamannalu tunngavigalugu ataatsimiititaliamut ilaasortat sassartitaqarfigineqarnerup nalaani sammisamut tunngatillugu isummersortaria-qanngillat tapersiisariaqaratillu – tamanna avataanersunik ataatsimeeqateqar-nernut/pulaarteqarnernut tamanut atuuppoq. Ataatsimiititaliap sammisag pillu-

gu ataatsimut isummernerminik suli oqallisiginnissimanginnera tamatumunnga pissutaavoq. Tamatuma saniatigut ataatsimiititaliamut ilaasortat sammisaq pillugu naalackersuinikkut tunuliaqutaminnik eqqartueqateqarnissamut suli periarfissaqarsimangillat.

Isertuussisussaataaneq [2023-mi februaarimi allanngortinneqartoq]
Ataatsimiititaliap sulinera pillugu nipangersimasussaataaneermik apeqqut nalinginnaasumik apeqqutunik amerlasuunik pilersitsisarpoq. Ataatsimiititaliap sulineranut tunngatillugu ilaasortat nipangersimasussaataanerisa kinguneri matuma kinguliani pingaarnertut nassuiaatigineqarput.

Inatsisartut Suleriaasianni § 13 ima oqaasertaqarpoq:

”§ 13. Ataatsimiititaliami oqaluuserineqartut tamanut tusarliunneqaqqusaanngillat.

Imm. 2. Ataatsimiititaliarli aalajangersinnaavoq nalunaarutit aalajangersimasumik annertussusilerlugit killilikkat tamanut tusarliunneqarsinnaasut.”

Aalajangersagaq pineqartoq ima nassuiaatitaqarpoq:

Ataatsimiititaliami ilaasortaq – § 12, imm. 1-imi aalajangersagaq apeqqutaattinnagu – ilaasortap pineqartup ataatsimiititaliap ataatsimiinnerani nammineq isummani annitani tusarliutiguaannarsinnaavai, taamaattorli ataatsimiititaliami ilaasortat allat ataatsimiinnermi oqaasii tusarliutiginagit. Taamaalluni ataatsimiititaliami ilaasortap ataatsimiititaliap ataatsimiinnerani oqaaseqaatini ataatsimiititaliami ilaasortanit allanit taparserneqarsimanersut isumaqatigineqarsimanginnerisulluunniit pillugu ataatsimiititaliami ilaasortaq pineqartoq oqaaseqaqqusaanngilaq.

Ataatsimiititaliami ilaasortap isumaqatigiinniarnerni isummani qanoq sunniuteqarsimanersut pillugu tamanut saqqummiukkusukkuniuk ataatsimiititaliat ataasiakkaat suleriaasiini aalajangersakkat naapertorlugu ilaasortap isummani sammisaq ataatsimiititaliap oqaluuserisaa pillugu ataatsimiititaliap isumaliutissiisutaani amerlanerussuteqartutut ikinnerussuteqartutulluunniit oqaaseqaatit saqqummiussinnaavai.

§ 13, imm. 2 suleriaatsimi atuuttumi § 13, imm. 2 assigaa.

Suliat ataatsimiititaliap ingerlatai pillugit ataatsimiititaliat tamanut nalunaaruteqarsinnaanerat aalajangersakkakut qulakkeerneqarpoq. Tamanut nalunaaruteqarnissaq isumaqatigiinngissutigineqarpat tamanna pillugu taasinikkut aalajangiisoqassaaq.”

Taamaalluni ataatsimiititaliamut ilaasortap nassuiaatit naapertorlugit allat avataaneersut oqaluttuussinnaavai suliassaq ataatsimiititaliap oqaluuserisimasaa pillugu nammineq qanoq isummersimanerminik oqaaseqarsimanerminillu. Tassanili taamaallaat pineqarput nammineq isummat oqaaserisimasallu, taak-kulu imatut oqaatigineqassallutik ersersinnagu allat qanoq isumaqarsimanersut oqaaseqarsimanersulluunniit. Tamanna immi mianersorfissaavoq.

Nipangiussisussaataaneq aalajangersakkap oqaasertai malillugit ataatsimiititaliami ”oqaluuserineqartunut” atuuppoq. Ataatsimiititaliali oqaluuserinninnerani (isumaqatigiinniarnerni) sammineqartoq akerlianik (aallaavittut)

nipangiussisussaataaernermut ilaatinneqanngilaq. Taamaattoqaraluarpammi ataatsimiititaliamut ilaasortaq mattunneqassaaq isumaqatigiinniarnerni nammineq oqaaserisimasanik allanut ingerlatitseqqiisinaanermik.

Tamatuma malitsigaa ataatsimiititaliap oqaluuserisassai (nassuiaatitaqanngitsut) aallaavittut isertuussassatut isigineqarsinnaanngimmata. Tamanna aamma atuuppoq atortussanut Naalakkersuisunit allanilluunniit avataaneersunit tiguneqarsimasunut.

Naak Naalakkersuisunut ilaasortaq Inatsisartunut ilaasortanut peqqussuteqarsinnaatitaanngikkaluartuq, nalinginnaasumik naatsorsuutigineqartarpoq ataatsimiititalianut ilaasortat atortussanut Naalakkersuisunut ilaasortap pineqartup isertuussassatut nalunaagaanut tunngatillugu ningangersimasussaataasut.

Taamaalluni paasissutissat atortussani naqitani Naalakkersuisunit "isertuussassatut" naqissuserneqarsimasuni ilaasut allatulluunniit isertuussassatut nalunaarneqarsimasut ataatsimiititaliani atortussanik tigusisuni ilaasortanik ingerlateqqinneqaqqusaanatillu issuarneqaqqusaanngillat. Tamanna aamma atuuppoq paasissutissanut paasissutissat pineqartut isertuunneqartussaanerat nalunaarlugu Naalakkersuisunut ilaasortap ataatsimiititaliamut oqaasiinnaakkut paasissutissiissutigisimasaanut.

Paasissutissalli allat aamma Naalakkersuisunit erseqqisummik isertuussassatut nalunaarneqarsimanngikkaluartut nipangiussisussaataaernermut ilaasinnaapput, paasissutissat isertuussassatut nalunaarneqarsimannginnerat kukkuneramik tunngaveqartoq erseqqippat. Tamatumani minnerunngitsumik eqqarsaatigineqarput paasissutissat inunnut ataasiakkaanut tunngasut kiisalu paasissutissat naalagaaffiup nunanut allanut tunngasutigut soqutigisaanut tunngasut.

Paasissutissat allanit Naalakkersuisuniunngitsoq ataatsimiititaliap tigusai taamatuttaaq isertuunneqartariaqarput paasissutissat isertuussassatut nalunaarneqarsimappata. Naak taakku aamma erseqqisummik isertuussassatut nalunaarneqarsimanngikkaluarpata taakku isertuunnissaannut pissutissaqarsinnaavoq taakku assersuutigalugu paasissutissanik inunnut ataasiakkaanut imaluunniit paasissutissanik naalagaaffiup nunanut allanut tunngasutigut soqutigisaanut tunngappata imaluunniit pisortat inuilluunniit ataatsiakkaat soqutigisaasa allatigut isiginiarneqarnissaannut tunngappata. Suliassat sularineqartarnerat pillugu inatsimmi § 27, imm. 1, nr. 1-7-imi aalajangersakkat matumani ilitsersuutitut atorneqarsinnaapput.

Paasissutissat erseqqisummik isertuussassatut nalilernerneqarsimanngikkaluarlutik isertuuttariaqarsinnaanerannik naliliinarneq ataatsimiititaliamut ilaasortamit allaffissornikkut inatsisilerinikkuulluunniit misilittagaqanngitsumit ajornarsinnaavoq. Ataatsimiititaliat allattaasa taamaattumik nalinginnaasumik ataatsimiititaliamut ilisimatitsissutigisinnaavaat paasissutissat isertuussassatut nalunaarneqarsimanngikkaluartut qaqugukkut isertuussassatut isigisariaqarnerannik.

Aningaasaqarnermut Ataatsimiititaliaq, Kukkunersuineranut Ataatsimiititaliaq aamma Nunanut allanut Sillimaniarnermullu Ataatsimiititaliaq eqqarsaatigalugit taakkununga nipangiusi mannitussaataaneq eqqarsaatigalugu immikkut malittarisassat Inatsisartut Naalakkersuisullu pillugit Inatsisartut inatsisaanni

aalajangersarneqarsimasut atuupput.

Ataatsimiititaliat ataasiakkaat suleriaasiini taamatuttaaq isertuussisussaataitaa-neq pillugu aalajangersagaqarsinnaavoq.

Suliami peqataasinnaaneq/peqataasinnaannginneq

Pingaarnertut isigalugu peqataasinnaanermut apeqqummi pineqartarpoq inuk pineqartarpoq atuuffimmik inatsisit naapertorlugit isumaginnissinnaanersoq. Inatsisartunut ilaasortat peqataasinnaanernut apeqqut qinersinerup kinguningua-tigut ilaasortat ataasiakkaat qinigaasinnaanerannik Qinigaanerup Misilinneqar-nissaanut Ataatsimiititaliap naliliineratigut nalinginnaasumik pisarpoq.

Soqutiginarnerusorli pingaarnerusorlu tassaavoq ataatsimiititaliap aalajangersi-masumik suliaqarnerani ilaasortat peqataasinnaanngissinnaanerannik apeqqut. Sulianik suliarinnitarneq pillugu inatsimmi peqataasinnaannginnermut aalaja-ngersakkat nalinginnaasut Inatsisartunut atuutinnigillat. Inatsit Tunngaviusoq, Inatsisartut Naalakkersuisullu pillugit Inatsisartut inatsisaat imaluunniit Inatsi-sartut Suleriaasiat peqataasinnaannginneq pillugu malittarisassanik imaqqanngil-lat.

Inatsisartunut ilaasortaq inatsisissatut imaluunniit aalajangiiffigisassatut siunnersuummik akuerseqataasinnaavoq imaluunniit itigartitseqataasinnaavoq, naak siunnersuut ilaasortamut pineqartumut taassumaluunniit qanigisaanut aningaasaqarnikkut aalajangersimasumik iluaqutissartaqaraluartoq ajoqutissar-taqaraluartorluunniit.

Taamatuttaaq ataatsimiititaliamut tunngatillugu Inatsisartunut ilaasortaq peqa-taasinnaanngitsutut nalinginnaasumik isigineqarsinnaanngilaq. Taamaattorli suliaassani, ilaasortamut inuttut qanittumik toqqaannartumillu attuumassuteqar-tuni, ataatsimiititaliamit aalajangiiffiqartussani Inatsisartunut ilaasortap attuumassuteqartutut immikkut illuinnartumik isigineqarsinnaanera mattutivin-neqarsinnaagunangilaq. Tamatumani assersuutigalugu pineqarsinnaavoq Inatsisartunut ilaasortap unnerluutigineqarsinnaannginnerata atorunnaarsinne-qarnissaa pillugu ataatsimiititaliaq inassuteqassatillugu imaluunniit suliami, Inernea ilaasortamut aningaasatigut toqqaannartumik iluanaarutaasinnaasumi Aningaasaqarnermut Ataatsimiititaliaq aalajangiisussaattillugu. Apeqqulli nalorni-nartorpoq, taamaattumillu pisariaqalerfiatigut inatsisilerinikkut sukumiisumik naliliiffiqartariaqassalluni. Tamanna manna tikillugu pisariaqarsimanngilaq.

Taamaakkaluartoq suliamik suliaqarnermi peqataannginnissani Inatsisartunut ilaasortap nammineerluni toqqarsinnaasarpaa. Taamatut aalajangersinnaaneq naalakkersuinikkut isigalugu kaammattuutigineqarsinnaavoq. Ataatsimiititalia-mili amerlanerussuteqartut ikinnerussuteqartulluunniit Inatsisartunut ilaasor-tamik taamak ilioqqusillutik pinngitsaaliinnaanngillat. Ataatsimiititaliap aalajangersimasumik suliaqarnerani apeqqut saqqummissagaluarpaa Siulittaa-soqarfimmu saqqummiunneqarnissaa pissusissamisuussaaq. Tamatuma aker-lianik ataatsimiititaliamut ilaasortaq tamatumunnga tunngavissaqarluangik-kuni peqataasinnaanngitsutut nalunaaruteqaannarnermigut suliap isummanik akerleriiffiusinnaasup suliarineqarnerani peqataanngitsoorsinnaanngilaq. Inatsisartunut ilaasortatut atuuffik qinikkatut pisussaaffiuvoq, taamaallunilu

suliap suliarineqarnerani ilaasorta q tunngavissaqarluannikkuni peqataangitsoorsinnaangilaq.

Siunnersuutit ataatsimiititaliani sulinermi iluaqutaasinnaasut

Siunnersuutit arlallit ataatsimiititaliani sulinermi iluaqutaasinnaasut matuma kinguliani saqqummiunneqarput. Ataatsimiititaliat aqqissuussinernut inuiaq-tigiinnit avatangiiserisanit nunaniluunniit allaneersunit peqataaffigineqartunut peqataaneranni Inatsisartunut ilaasortat Inatsisartut Kalaallit Nunaallu sinnerlu-git aallartitatut isigineqarnerat siunnersuutitut tunngaviutinneqarpoq. Siunnersuutilli aamma ataatsimiititaliat sulineranni ataatsimiititaliallu ataatsimiinne-ranni najoqqutassaapput.

1. Oqaluuserisassat ilanngussat ilanngullugit ataatsimiititaliat ataatsimiinne-ranni qitiulluinnarlutik najoqqutassaapput – taamaattumillu atuarluarneqa-reersimasariaqarlutik.
2. Aqqissuussamat peqataalernerme pisussanut pilersaarut/ataatsimiigiaq-qusissut sukumiisumik atuaruk. Assersuutigalugu ataatsimiititaliap anga-lanerani pisussanut pilersaarut oqaluuserisassanik nalunaarsuiffittut isigineqarsinnaavoq taamaammallu aamma taamak sukumiitigisumik atuar-neqartariaqarluni.
3. Eqeersimaartumik peqataanissannut piareersimagit.
4. Oqarasuaatit toqqorallaak. Naak sulininni oqarasuaat qarasaasiarsornikkut sakkusaaq pitsaasuugaluartoq atorneqarnera sapinngisamik minnerpaaffim-miitittariaqarpoq – tamanna ataatsimiititaliap nammineq ataatsimiinnerani minnerunngitsumillu avataaneersunik ataatsimeeqateqarnerani atuuppoq. Ataatsimeeqatitit eqiingasumik najuuffigikkat, ataatsimiinnerullu sunniu-tilimmik pitsaasuunissaanik qulakkeerinneqataagit.

5. Ataatsimiititaliap angalanerani pisussanut pilersaarummut uparuaatissaqaruit, missingiut tigugukku piaartumik tamanna pillugu Siulittaasumut ataatsimiititalialluunniit allattaanut erseqqissaateqarit. Naammaginngisaqarneq ataatsimiititaliap Siulittaasuanut allattaanulluunniit toqqaannarlugu oqaatigineqartariaqarpoq, ataatsimiititaliap pulaagaasa najuunneranni pinnani.
6. Ataatsimiititaliap ilaasortaatut suliffeqarfinnik, suliniaqatigiiffinnik, innuttaasunik, nunani allani inatsisartunut ilaasortanik il.il. naapitsinermi ataqqinnippalaarit. Ataqqinninneq nammineq 'nunagisami' takutinneqartariaqarsorisat naapertorlugu naapitannut ataqqinnigit. Ilaatigut torersumik pissusilersortussaaneq soqutiginnissutsimillu takutitsisussaaneq tamatuma nassataraa.
7. Ataatsimiititaliap ataatsimeeqatissaasa kikkunerinik siumut paasiniaa reerit.
8. Isumaqatigiissutit malikkit – tamanna ataatsimiititaliami namminermi isumaqatigiissutinut, minnerunngitsumillu ataatsimiititaliap naapitaminut avataaneersunut isumaqatigiissutigisaanut atuuppoq.
9. Nunani allani ileqqulersuutit ileqqutoqqallu, nammineq nunanni sungiusimasannit allaanerusinnaasut ataqqikkit. Tamatumani nerisaqariaatsit, saaffigineriaaseq, ileqqulersorneq, assukkersoriaatsit il.il. allaanerusut pineqarput.
10. Eqqaamallugu angallassinermi – assersuutigalugu kinguaattoortoqarnerani – Inatsisartunut ilaasortat allanit sallinneqartussaannqillat.

6

Aallartitat,
siunnersuisoqatigiit
aalajangiisartullu

Aallartitat

Aallartitaq/tat tassaavoq/pput Inatsisartunut ilaasortat nunat tamalaat akornanni suliniaqatigiiffinni ataatsimiinnernut, inatsisartoqarnikkut suleqatigiiffinni il.il. Inatsisartut sinnerlugit peqataasussatut toqqarneqartartut. Taamaalillutik aallartitat tassaangillat ataatsimiititaliat – imatut paasillugu aallartitat ingerlatsinermik (Naalakkersuisunik) nakkutilliisussaangillat siunnersuutillu pillugit isumaliutissiissusiortussaananik. Aallartitaqatigiinnik sisamanik Inatsisartut toqqaasarnerat ileqquvoq:

Naalagaaffiit Peqatigiit Ataatsimeersuarnerat

Inatsisartut 1992 aallarnerfigalugu Naalagaaffiit Peqatigiit Ataatsimeersuarnerannut peqataasarput. Ataatsimeersuarneq ukiumut ataasiarluni New Yorkimi pisarpoq – septembarimi aallartittumik. Ataatsimeersuarneq nunanit ilaasortaa-sunit tamarmiusunit 193-iusunit, naalagaaffimmi naalakkersuisunullu pisortaa-sunik aallartitaqakkajuttunit peqataaffigineqartarpoq. Ataatsimeersuarnerup immikkuullarequtigaa nunat tamarmik naligiinnerat – nuna ataaseq, taasineq ataaseq. Inatsisartut ilaasortanik marlunnik imminnut paarlakaattunik aallarti-taqartarput – taamaalillutik ilaasortat pineqartut avillutik Ataatsimeersuarnerup immikkoortuani suillermi aappaanilu peqataasarlutik.

NaalagaaffiitPeqatigiit ataatsimeersuarnerannut aallartitassat sinniisussallu inissitsiterfiusumik ataatsimiinnermi Inatsisartullu ukiuata aallartinnerani qinerneqartarput. Partiit sapinngisamik amerlanerpaat aallartitaqarnissamut periarfissikkumallugit suleriaatsimi § 26 a malillugu qinersineq paarlakaajaalluni peqataatitaqartarnermik najoqqutaqarluni pisarpoq.

Uani erseqqinnerusumik paasisaqarit: www.un.org/en/ga

Inuit Circumpolar Council (ICC)

Inuit Issittormiut Siunnersuisoqatigiiffiat ICC nunat tamalaat akornanni soquti-gisaqatigiiffiuvoq Canadamit, Kalaallit Nunaannit, Ruslandimit (Chukotkamit) kiisalu USA-mit (Alaskamit) issittumi innuttaasunit (Inunnit) ilaasortaaffigine-qartoq. Kalaallit Nunaata ICC-mut aallartitai 16-iupput taakkunanga pingasut Inatsisartunit toqqarneqartarput.

ICC-mut ilaasortassanik qinersineq Inatsisartunut qinersereermermi Inatsisartut inissitsiterfiusumik ataatsimiinneranni pisarpoq. Ilaasortat d’Hondtip periusia malillugu qinersiviusorlu naallugu atuuttumik qinerneqartarput. Tamatumani ilaasortap Inatsisartunut qinigaasimanissaa piumasaqaataangilaq.

Uani erseqqinnerusumik paasisaqarit: www.inuit.org

Nunat Avannarliit Siunnersuisoqatigiiffiat

Nunat Avannarliit Siunnersuisoqatigiiffiat Inatsisartut akornanni suleqatigiiffiu-Nunat Avannarliit Siunnersuisoqatigiiffiat Inatsisartut akornanni suleqatigiif-fiuvoq Danmarkimiit, Finlandimiit, Islandimiit, Norgemiit Sverigemiillu kiisalu nunanit namminersorfiusunit pingasunit Kalaallit Nunaannit, Savalimmiunit Ålan-di-miillu Inatsisartunut ilaasortanik 87-iusunit peqataaffigineqartoq. Inatsisartut marlunnik ilaasortaatitaqarput. Nunat Avannarliit Siunnersuisoqatigiiffianut ilaasortassat inissitsiterfiusumik ataatsimiinnermi Inatsisartullu ukiuata aallar-

tinnerani d'Hondtip periusia malillugu qinerneqartarput.

Nunat Avannarliit Siunnersuisoqatigiiffiat nalinginnaasumik ukiumut tallimariarluni ataatsimiittarpoq. Naalakkersuinikkut suliaqarneq ingerlaavartoq, partiikkaarluni suleqatigiinnerup saniatigut siunnersuisoqatigiiffiup ataatsimiititaliaani tallimani pisarpoq. Ataatsimiititaliani nalinginnaasumik ukiumut marloriarluni ataatsimiittoqartarpoq. Nunat ataasiakkaat tulleriaarlutik siunnersuisoqatigiiffiup ataatsimiinnerinik ukiakkullu katersuunnerinik tikeraartitsisuusarput. Siulittaasuuneq nunanit ataasiakkaanit ima tulleriaanilerlugu ukiukkaartumik tigummineqartarpoq: Danmark, Finland, Norge, Sverige aamma Island.

Uani erseqqinnerusumik paasisaqarit: www.norden.org

Nunat Avannarliit Killiit Siunnersuisoqatigiiffiat

Nunat Avannarliit Killiit Siunnersuisoqatigiiffiat Inatsisartut akornanni suleqatigiiffiuvoq Kalaallit Nunaanni Inatsisartunit, Islandimi Altingimit kiisalu Savalimmiuni Lagtingimit aallartitanit ilaasortaartoq. Aallartitat ataasiakkaat tamarimik arfinilinnik ilaasortaarput, Inatsisartut Siulittaasuat ileqquusut malillugit Kalaallit Nunnaannit aallatitanut Siulittaasusarpoq – taamatullu Nunat Avannarliit Killiit Siunnersuisoqatigiiffiata Siulittaasoqarfiani Kalaallit Nunaannit ilaasortaataalluni.

Ilaasortassanik qinersineq – Inatsisartut ukiuata aallartinnerani - d'Hondtip periusia malillugu pisarpoq.

Nunat Avannarliit Killiit Siunnersuisoqatigiiffiat, Siulittaasoqarfiup Siulittaasuisa paarlaattarnerinut assingusumik nikerartumik sumiiffilerneqartartumik ukiumoortumik ataatsimiittarnerup saniatigut, ukiumut ataasiarluni aalajangersimasumik qulequtaqartitsilluni ataatsimeersuuartarpoq. Nunat Avannarliit Killiit Siunnersuisoqatigiiffiat ukiumoortumik ataatsimiinnermini kaammattuutit aalajangersagassanik akuersissuteqarsinnaavoq, kingorna nunat ataasiakkaat inatsisartuini suliassanngorlugit saqqummiunneqartussanik.

Nunat Avannarliit Killiit Siunnersuisoqatigiiffiat 2017 aallarnerfigalugu Issittumi Siunnersuisoqatiinni alaatsinaatsutut inissisimalerpoq.

Uani erseqqinnerusumik paasisaqarit: www.vestnordisk.is

Siunnersuisoqatigiit aalajangiisartullu

Inatsisartut siunnersuisoqatigiinnut aalajangiisartunullu arlalinnut ilaasortassanik ataasiakkaanik inatsisit atuuttut malillugit toqqaasarput. Siunnersuisoqatigiinnut aalajangiisartunullu pineqartunut ilaasortat piffissami aalajangersimasi atuttussatut toqqaarneqartarput, tamatumalu Inatsisartut qinikkatut atuuffiat malittariaqanngilaa. Tamatumani ilaatigut uku pineqarput Naartuersitarneq pillugu Naammagittaalliuteqartarfik, Avatangiisit Innarlitsaaliorneqarnissaat pillugu Naammagittaalliuteqartarfik aamma Pinerlunnernit Eqqorneqartunut Taarsiissuteqartarneq Pillugu Nævni. Siunnersuisoqatigiit aalajangiisartullu pilersinneqarsimasut piffissallu ilaasortassanik toqqaaffiit pillugit paasisutisat Inatsisartut nittartagaanni pissarsiarineqarsinnaapput.

KAPITALI 6

Pisut ilaanni tungavissamillu erseqqinnerusumik aalajangersaasoqarsimatillugu inuit Inatsisartunut ilaasortaangitsut siunnersuisoqatigiinni aalajangiisartunilu assigiinngitsuni Namminersorlutik Oqartussat sinnerlugit ilaasortatut toqqarneqartarput. Taakku tassaasinnaallutik soqutigisaqatigiinnit suliffeqarnermilu peqatigiiffinit aalajangersimasunit assigisaannillu aallartitat.

7

§ 37 naapertorlugu
apeqqutit

Suleriaatsimi § 37 naapertorlugu Inatsisartunut ilaasortaq partiillu pisortat suliassaataat pillugu Naalakkersuisunut apeqquteqarnikkut paasisutissanik pissarsiniarsinnaavoq. Apeqqut naatsuusaaq erseqqissumik allanneqarsimasalluni tunngavilersuummillu ilaqartinneqarluni. Apeqqut, Inatsisartut Siulittaasuannut ingerlatinneqartussaq, naatsumik erseqqissumillu ilusilerneqassaaq tunngavilersuutitaqassallunilu. Apeqqut pasilleerpalaartuussanngilaq ikuillu ataasiakkaat pillugit sulianut tunngasuusanani. Tamatuma saniatigut apeqqutit ilusiligaanissaannut arlalinnik piumasaqaateqarpoq, takuuk [intra.ina.gl](https://ina.gl).

Tunngavilersuut apeqquteqarnermut pissutaasunut tamakkiisunik itisiliinerusaaq. Inatsisartunut ilaasortat tamarmik kiisalu partiit allatseqarfii Inatsisartut Allattoqarfiannut saaffiginninnermikkut ilusiliinissamut piumasaqaatinik naammassinninnissaq qulakkeerniarlugu siunnersorneqarsinnaallutillu ikiorserneqarsinnaapput. Ilusiliinissamut piumasaqaatit pillugit uani paasisaqarnerugit: https://ina.gl/dokumenter/paragraf37/spoergsmaal_til_naalakkersuisut/

Tamatuma kingorna apeqquteqartoq Naalakkersuisunit allakkatigut akissutisissaaq. Nalinginnaasumik ullut suliffiusut qulit qaangiutsinnagit Naalakkersuisut akissuteqartussaapput. Tamanna ajornassagaluarpat Naalakkersuisunut ilaasortap akissuteqartussap apeqquteqartumut allakkatigut tamanna nalunaarutigisavaa. Kinguaattoornermut tunngavilersuut akissullu qaqugu naatsorsuutigineqarsinnaanersoq ilanngullugu nalunaarutigineqassaaq.

Akissuteqaat Naalakkersuisunut ilaasortamit atsiorneqarsimassaaq nalinginnaasumillu § 37 naapertorlugu apeqqutitut akissutit assigalugit kalaallisut danskisullu Inatsisartut Allattoqarfiannut tunniunneqassalluni.

8

Inatsisartuni partiit

Naalakkersuinikkut suliniaqatigiiffiit partiit atuuffiat

Tamat oqartussaaqataanerat aallaavigalugu aaqqissuussinermi naalakkersuinikkut partiit inissisimanerat Inatsisini Tunngaviusuni, Namminersornerulluni Oqartussaaneq imaluunniit Namminersorluni Oqartussaaneq pillugu inatsimmi oqaatsimik ataatsimilluunniit taaneqangilaq. Taamaakkaluartoq partiit qitiusumik inissisimapput. Inatsisartunut ilaasortat amerlanerpaartaat partii sinnerlugu qinigaapput.

Partii naalakkersuineramik suliaqartoq tunngaviusumik isigalugu inuinnarnit peqatigiiffiuvoq pissutsit assigiinngitsut pillugit assigiinnik isummersuuteqartunik aammalu Inatsisartuni kommunalbestyrelsiniluunniit aalajangiunneqartartut pillugit sunniuteqarnissamik kissaateqartunik ilaasortalik. Partiimi ilaasortanngorinnikut naalakkersuinermillu ingerlatsinermi eqeersimaartumik peqataanikut innuttaasoq peqatinilu najukkani nunalu tamaat isigalugu inuiaqatigiit qanoq inissitsiterneqarnerannut sunniuteqarniartarput.

Tamat oqartussaaqataanerat aallaavigalugu aalajangiisartuutitani, tassa partiimit qinigassanngortitat Inatsisartunut, kommunalbestyrelsinut nunaqarfinnullu aqutsisunut imaluunniit danskit Folketingianni 179-inik ilaasortalimmu Kalaallit Nunaat sinnerlugu marlunnik ilaasortaatitaqarfiusumut qinigaanerisigut sunniisinnaassuseqarneq annertunerpaaq partiip angusinnaavaa.

Partii Inatsisartunut qinersinermi kingullermi qinigaatitaqarsimaguni Inatsisartunullu qinersinissap nalunaarutigineqarnerani suli ilaasortaatitaqaruni Inatsisartunut qinigassanngortitsisinnaavoq. Partiit Inatsisartunut ilaasortaatitaqariinngitsut qinersisartut atsiornerinik Inatsisartunut qinersinermi kingullermi taasisut atorsinnaasut tamarmiusut ilaannik 1/31-inik naleqartunik pissarsisinaagunik qinigassanngortitsisinnaapput.

Partiit aaqqissuusaanerat

Inatsisartunut ilaasortat Inatsisartuni gruppinnut partiit Inatsisartunut ilaasortaataannik ataasiakkaanik inuttaqartunut agguarneqarajupput. Gruppi Inatsisartut ataatsimiinneranni ullut tamarluinnangajaasa Inatsisartuni sulineq eqqartorniarlugu ataatsimiittarpoq. Gruppi gruppi sulittaasuanik aammalu sulittaasup tullianik ataatsimik marlunnilluunniit (naalakkersuinermut tunngasuni aammalu aaqqissuusaanermut tunngasuni sulittaasup tullinik) aqunneqartarpoq. Tamatumani saniatigut gruppi arlalinnik oqaaseqartartuutitaqartarpoq, taakkulu eqqartorneqartoq apeqquataatillugu Inatsisartut ataatsimiinneranni partiip gruppia sinnerlugu oqaaseqartarput.

Partiit avataanni: Kattusseqatigiit, kisimiillutik qinigassanngortittut attaviitsullu

Partiit Inatsisartunut qinersinermi qinigassanngortitsinissamut kisimik periarfisaqartinneqangillat. Partiimik tunuliaqutaqarani Inatsisartunut qinigassanngortinneq aamma ajornanngilaq.

Partiimut attaveqarani qinigassanngortittut "kisimiillutik qinigassanngortittut" taaneqartarput. Kisimiillutik qinigassanngortittut Inatsisartunut qinigaanissaminnut taasisunik naammattunik pissarsisinnaanerat ajornakusoortarpoq. Ataasiakkaanulli tamanna iluatsitsiffiusarsimavoq.

Partiit avataasigut qinigassanngortittut ataatsimoorlutik isumaqatigiissuteqarnermikkut “kattusseqatigiinnorsinnaapput”. Taamaaliornikkut taasisunik annaasaqarsinnaaneq annikillisinneqarsinnaavoq, tassa qinigassanngortittoq Inatsisartunut qinigaanissaminut naammattunik taasiseqarsimangippat taasisaasa kimut tutsinneqarnissaat pillugu isumaqatigiissuteqartoqarsinnaammat. Imaassinnaavoq kattusseqatigiit sinnerlugit qinigassanngortittut pingasut ima qinersiseqartigisut inummik ataatsimik qinigaatitaqarsinnaallutik, naak taakku tamarmik immikkut ima amerlatigisunik taasiseqanngikkaluartut arlaannaalluunniit qinigaasinnaalluni.

Inatsisartunut ilaasortaq partii sinnerlugu qinigaasimasooq nammineq sulissuteqarnini naapertorlugu imaluunniit anisitaanermigut partiimit tunuarsinnaavoq. Inatsisartunut ilaasortaq taama iliortoq “attaviitsumik” taaneqartarpoq.

Naalackersuinikkut suliniaqatigiiffinnut partiinut aningaasatigut tapiissuteqartar-neq il.il.

Inatsisartuni naalackersuinikkut sulinerup nakussassarneqarnissaa anguniarlu-gu partiit, kattusseqatigiit, kisimiillutik qinigaasut attaviitsullu Inatsisartunut ilaasortaasut aningaasatigut tapiiffiqineqartarput. Tapiissutinik qinnuteqaat ukiumi qinnuteqarfiusumi kingusinnerpaamik marsip ulluisa aallaqqaataanni tun-niunneqassaaq. Ilaasortaatanut tapiissutit ukiumi qinnuteqarfiusumi januaarip ulluisa aallaqqaataanni Inatsisartunut ilaasortaatat amerlassusiat malillugu tunniunneqartarput. Inatsisartunut ilaasortaq attaviitsunngorniarluni partiimi gruppianit tunuarpat imaluunniit partiimut allamut nuuppat ukiup sinneranut partiimut tapiissutit ikilineqarneq ajorput. Qaammammit Inatsisartunut ilaasor-tap partiiminit kattusseqatigiinnilluunniit tunuarfiata naanerani naatsorsorlugu ilaasortaq qinnuteqarnermigut ilaasortaanermit ukiumoortumik tapiissutit ilaa-nit pissarsiaqarsinnaavoq. Ukiumut tapiissutit ataasiakalaarlugu tunniunneqarani marlunnut avillugu tunniunneqartarpoq, takuuk malittuani.

Partii nutaaq ilaasortap ataatsip arlallilluunniit maannamut partigrupperisimasa-minnik qimatsinerisigut Inatsisartunut sinniisuutitaqalersooq partiip Inatsisartuni naalackersuinikkut suliaqarneranut tapiissutinik pissarsisinnaavoq.

Ukiup siuliani aningaasat tunniunneqartut atorneqarnerannut naatsorsuutininik kukkunerisukkani kukkunerisuisumit akuerineqartunik kingusinnerpaamik juunip ulluisa 30-ianni nassiussisoqassaaq. Naatsorsuutit piffissaq eqqorlugu nassiunneqanngippata tapiissutit ukiup sinneranut tunniunneqartussat kinguar-tinneqarsinnaanerit atorunnaarsinneqarsinnaaneralluunniit naatsorsuutigine-qarsinnaavoq.

Naatsorsuutit nassiunneqartut Inatsisartut Siulittaasoqarfiata Inatsisartut nittartagaasigut tamanut saqqummiuttussaavai.

Tapiissuteqartarneq pillugu inatsit malillugu tapiissutit Inatsisartuni naalacker-suinikkut suliaqarnermut tapiissutit immikkut tunniunneqartarput, taamaalil-lutillu nuna tamakkerlugu naalackersuinikkut kattuffiup suliaqarnissaanut tun-niunneqartaratik. Tamatuma kingunerisaanik anguniagaq taanna naapertorlugu tapiissutit atorneqartussaapput. Tapiissutinut pingaartumik ilaapput atortussat Inatsisartunit atorneqartussat, soorlu aalajangiiffigisassatut siunnersuutit aam-

malu § 37 naapertorlugu apeqqutit, nutsertinneqarnerannut aningaasartuutit.

Partii tapiissutinik pissarsisartoq atortussat taamaattut kalaallisut danskisullu nassiuttarnissaannut taamaalilluni pisussaatinneqarpoq.

Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaat nutaq 1. januar 2013-imi atuutilerpoq. Ilaatigut partiit naalackersuinikkut ingerlatsinermi kikkunnit aningaasaliiffigineqartarnerisa tamanit paasineqarsinnaanissaata qulakkeernissaa inatsisikkut siunertarineqarpoq. Inatsimmi erseqqissumik allassimavoq naalackersuinikkut suliniaqatigiiffiit naatsorsuutaat partiip nuna tamakkerlugu kattuffiata isertitatigut tunngasunik paasissutissanik arlalinnik imaqassasut, tassunga ilanngullugit partiit pisortaniit tapiissutisisarnerat pillugu maleruagassatigut pisortanit pissarsiarineqartut, ilaasortaniit inuinnarniillu, nunani tamalaani suleqatigiiffinniit, inuunnaat ataatsimoorussamik peqatigiiffiinit, suliatigut kattuffinniit, inuusutissarsiorlut suleqatigiiffiinit, inuusutissarsiorluni suliffeqarfinniit, aningaasaateqarfinniit peqatigiiffinniillu isertitat annertussusaat. Partii ukiumi naatsorsuiffimmi akiliuteqartumit ataatsimiit akileeqataassumik imaluunniit akileeqataassutinik arlalinnik katillugit 10.000 kr.-inik amerlanerusunik pissarsisimappat akiliisup aqqa najugaalu ukiumoortumik naatsorsuutinit takuneqarsinnaassaaq. Tassani tunngavigineqarpoq akiliisup kinaassusianik partiip ilisimaninnissaa.

Nunaqarfinni aqutsisunut, kommunalbestyrelsinut Inatsisartunullu qineqqusaarnermut atatillugu aningaasanut inatsimmi aningaasanik immikkoortitsisoqarajuppoq. Taamaattorli partiit qineqqusaarnissamut tapiiffigineqarnissamut eqqartuussivikkoortumik piumasaqaateqarsinnaatitaanngillat.

Partiit allattoqarfiisa Inatsisartullu Allattoqarfiata akornanni suleqatigiinneq

Partiit allattoqarfiisa Inatsisartullu Allattoqarfiata akornanni suleqatigiinneq Inatsisartut allattoqarfeqarneranni sulinerup ilagaa. Partiilli soqutigisaqaqatigiiffittut namminersortutut isigineqarmata Inatsisartullu allaffeqarfiat pisortat ingerlatsivigimmassuk eqqaasitsissutigissallugu pisariaqarpoq. Inatsisartut allaffeqarfiat allaffeqarfittut, aqqqissuussaannikkut, aningaasaqarnikkut allatluunniit naalackersuinermik ingerlatsinikkut partiinut akulerutsinneqassanngilaq. Allaffeqarfiulli partiilli akornanni aqqqissuussaasumik ingerlaavartumillu suleqatigiittoqarnissaanut tamanna soorunami akimmisaartitsinngilaq.

Allaffeqarfiup partiilli piginnaasaannik pitsanngorsaaqqinnissaq siunertaralugu suleqatigiinneq ingerlaavartumik nalilersorneqartarpoq.

Allaffiit agguataarneqarnerat illuutinullu tunngasut

Inatsisartut illuutaani inini allerni partiit allattoqarfiinut ilaasortanullu allaffinnik atugassaqartitsisoqarpoq, soorluttaaq illu L-imi ini qullermi Inatsisartut illuutaanut atasumi ikittunnguanik allaffeqartoq. Tamatuma peqatigisaanik illorsuaq Namminersorlutik Oqartussat Inatsisartullu Allattoqarfiata aqutsiveqarfiattut atuuppoq. Allaffinnik assut amigaateqartoqarmat partiilli Namminersorlutik Oqartussat aqutsinerannut ilaanngimmata, taamaattumillu aqqqissuussaannerminalinginnaasumik atorfilltanut atasunngorlugit inissinneqarsinnaanatillu inissin-

neqartariaqangimmata, illorsuup iluani illorsuulluunniit avataani allaffinnik partiinut atugassiisoqarsinnaanngilaq. Inatsisartuni sulineq siuarsarniarlugu allaffiit atugassiissutigineqarmata malugeqquneqarpoq. Taamaattumillu tunngaviusumik Inatsisartut sulinerannut attuumassuteqanngitsunut allaffiit atorneqaqqusaanngillat. Pingaartumik init nammineq ingerlatanut (inuussutisarsiuutinut) tunngasumik ingerlatsivigineqaqqusaanngillat.

Allaffiit partiit ilaasortaqqortussusiat naapertorlugu agguanneqartarput. Tamatumani saniatigut partiit annerit sisamat allaffimmik angineramik, ataatsimiittarfittut nalinginnaasumik atorneqarsinnaasumik, atugassinneqartarput.

Partiit marluk ilaasortalluunniit ataasiakkaat allaffinnik ataatsimiittarfinnulluunniit paarlaaseqatigiinnissamik isumaqatigiissuteqarsimagunik Allattoqarfimmuut tamatuminnga nalunaaruteqaannassapput. Allaffiilli agguataarneqarneri pillugit isumaqatigiinnissutaasinnaasut aalajangiiffigineqarnissaat Siulittaasoqarfiup Inatsisartut Allattoqarfiat aqutqigalugu oqartussaaffigaa.

Illorsuup aserfallatsaalineqarnera Inatsisartut Allattoqarfiat isumaqatigiissuteqarfigalugu Naalakkersuisut illuutinut immikkoortortaanit isumagineqartarpoq.

Inatsisartut 2019-imi oktobarimi Namminersorlutik Oqartussat illutaqarnikkut ingerlatsiviannit Allattoqarfiup allaffiisa ilaanni kiisalu partiit allatseqarfiisa ilaanni annertuumik PCB-qarneranik uuttuisoqarsimanera pillugu ilisimatinneqarput. Taamaallilluni init taakku pineqartut iluarsartuunnissaannik pilersaarusiortoqarsimavoq, tassa Allattoqarfiup allaffiisa ilaasa kiisalu partiit torsuusaanni allaffiit ilaasa 2023-p qiteqqunnerani nuutsinneqarnissaat naatsorsuutigisariaqarpoq. Nuutsitsinissap taassuma pilersaarusiornera 2023-mi ingerlanneqarpoq. Iliuussissanut pilersaarut tigussaasoq pigineqaleriarpat Inatsisartut pilersaarusiorneq taanna pillugu erseqqinnerusumik ilisimatinneqarumaarput.

Aammattaaq allaffiit oqoqarnerisut misissuiffigineqarsimapput, tamatumalu kingorna ingerlaavartumik arlalitsigut iluarsaanneqartarsimallutik. Tamatumani kingorna sulii allani oqunnik nassaartoqaqqissimanngilaq, taamaattumillu illorsuaq oqoqanngitsutut isigineqarpoq. Iulli iluata silaannarissuunissaa eqqarsaatigalugu silaannarissarfiit ammatinnerisigut silaannarissartarnissaq kaammattuutigineqarpoq.

9

Najuutinngikkallarneq

Inatsisartunut ilaasortaaneq pisussaaffigalugu qinikkatut atuuffiuvoq. Tassa ilaasortat tamarmik najuuttussaataapput. Pisunili immikkut ittuni ilaasortap sulingiffeqarallarnissaanik Siulittaasoqarfik akuersissuteqarsinnaavoq – soorlutaq ilaasortaq atuuffimminik isumaginnissinnaanngikkallarsinnaasoq. Ilaasortap najuutinnngikkallarnerani pisariaqarpat sinniisussaanic aggersaasoqarsinnaavoq – imaluunniit partiit akunnerminni taasisarneq pillugu isumaqatigiissuteqarsinnaapput.

Sinniisussamik aggersaasarneq

Sinniisussamik aggersaanissamik Siulittaasoqarfimmut qinnuteqartoqartussavoq sinniisussamilu aggersaasoqassanersoq Siulittaasoqarfimmit aalajangerneqartarpoq. Ataatsimiittarfimmi ilaasortat agguataagaanerisa allannguuteqarnera pissutigalugu sinniisussamik aggersaannginneq Inatsisartut aalajangiinerannut sunniuteqartussaannngitsutut nalilerneqarpat ullunit 14-iniit sivikinnerusumik najuutinnnginnermut sinniisussamik nalinginnaasumik aggersaasoqarneq ajorpoq. Ataatsimiititaliani sulinermi sinniisussamik aggersaasarnermut tunngatillugu immikkoortoq “Ataatsimiititaliat” takuuk.

Taasisarnermi isumaqatigiissuteqartarneq

Taasisarnermi isumaqatigiissuteqarneq partiit – qinerseqatigiittartulluunniit – akunnerminni isumaqatigiissuteqarnerisigut pisarpoq. Isumaqatigiissuteqarnermut immersugassaq partiinit/attaviitsunillu tamanit atorneqartussaq Allattoqarfimmit tunniunneqartarpoq. Allattoqarfik avaqqullugu isumaqatigiissuteqartoqartarpoq immersuisoqarlunilu, Allattoqarfiup isumaqatigiissut taamaallaat ataatsimiinnermik aqutsisumit uppernarsaatit atugassatut tigusarpar. Taasisarneq pillugu isumaqatigiissutit ataasiakkaat tassaapput qinerseqatigiittartut illuatungeriit ilaasortaannit inuit marluk aqqisigut taasat Inatsisartut ataatsimiittarfianni taasinermi peqataannginnissaanic partiit akunnerminni isumaqatigiissutaat, taamaalilluni inatsisartutigit pissaanerup agguataagaanera innarlerneqarani. Taasisarnermut isumaqatigiissutit taamaallaat Inatsisartut ataatsimiittarfianni taasisarnermut atuupput. Taamaalilluni ilaasortaq taasisarneq pillugu najuutinnngitsumik isumaqatigiissuteqarfiginnissimasoq sulil Inatsisartut ataatsimiittarfianni oqallinnermut peqataasinnaatitaavoq. Taasisarneq pillugu isumaqatigiissuteqarsimasut isumaqatigiissummik eqquutsitsinissaq taamaalillutillu taaseqataannginnissartik kisimik akisussaaffigaat. Ilaasortaq taasisarneq pillugu isumaqatigiissuteqarsimasoq kukkulluni taasisoorsimaguni tamanna pillugu ataatsimiinnermik aqutsisumut piaartumik nalunaarsinnaavoq - taassuma taasinerup uteqqinneqarnissaa imaluunniit kukkulluni taasinerup taasinerup inerneraniit peerneqarnissaa aalajangissavaa.

Taasisarnermi isumaqatigiissutit Inatsisartut ataatsimiittarfianni ataatsimiinnissaq sioqqullugu Siulittaasoqarfimmut nalunaarutigineqassapput. Taasisarneq pillugu isumaqatigiissutit najuutinnngikkallarnissamik nalunaaruteqarnermut taarsiullugit atorneqarsinnaanngillat (tamanna assersuutigalugu nappaammik pissuteqartumik), tamannami sulil Siulittaasoqarfimmut allakkatigit nalunaarutigineqartussaamat.

Sulninggiffeqarallartarneq najuutinnikkallartarnerlu

Sulninggiffeqarallartarneq najuutinnikkallartarnerlu pillugit malittarisassat periuserineqartullu erseqqinnerusut Inatsisartut Suleriaasianni ilanngussa 2-mi takuneqarsinnaapput, taakkunanngalu uku erseqqissaatigineqarsinnaapput:

Aningaasarsiaqaatigalugu sulninggiffeqarallarneq

§ 2. Inatsisartunut ilaasortaq napparsimanermik pissuteqartumik, najuutinninnissaalu ullorsiutini ullut 14-it sinnerlugit sivissuseqarnissaa ilimagineqarpat, atuuffimminit najuutinnikkallarnissamut pissutisaqavippat ilaasortaq sulninggiffeqarallarnissamut akuerineqarsinnaavoq.

Imm. 2. Naartunermut, erninermut meeravissartaarnermulluunniit atalilugu Inatsisartunut ilaasortaq sulninggiffeqarallarnissamut akuersissummik tunineqarsinnaavoq, kisianni tamanna malittarisassat Namminersorlutik Oqartussat tjenestemandiinut qaqugukkulluunniit atuuttut malillugit.

Imm. 3. Qanigisap toqkukut qimagunnerani perululluniluunniit napparsimanerani Inatsisartunut ilaasortaq sulninggiffeqarallarnissamut akuerineqarsinnaavoq, kisianni tamanna malittarisassat Namminersorlutik Oqartussat tjenestemandiinut qaqugukkulluunniit atuuttut malillugit.

Aningaasarsiaqaataannngitsumik sulninggiffeqarallarneq

§ 3. Inatsisartunut ilaasortaq piffissami Naalakkersuisutut, Folketingimut ilaasortatut kommunalbestyrelsimulluunniit, tassani aamma borgmestertut viceborgmestertullu, atuuffimmik paarsaqarniarluni sulninggiffeqarallarnissamut akuerineqarsinnaavoq.

§ 4. Pisuni immikkorluinnaq ittuni §§ 2-mi 3-milu taaneqartut saniatigut pissuteqarluni Inatsisartunut ilaasortaq sulninggiffeqarallarnissamut akuerineqarsinnaavoq, tamanna namminersorluni ingerlatamini suliassamik nukingernartumik suliassanilluunniit allanik nukingernartunik aallussinissaa pisariaqarluinnartutut isigineqarpat.

Najuutinngikkallarneq

§ 5. Inatsisartunut ilaasorta q sulinnigiffeqarallarnissamut akuerineqarsi-manngitsoq atuuffimminillu isumaginninnissaminut akornuserneqarallartoq, tamanna pillugu najuutinnginnissallu qanoq sivilisutiginissaa ilimagineqarnersoq paasissutissiisutugalugu engerluni Siulittaasoqarfimmut nalunaaruteqassaaq.

§ 6. § 5 malillugu najuutinngikkallarneq ilaasortap napparsimaneramik pissuteqarpat, najuutinngikkallarnerullu ullorsiutini ullut 14-it sinnerlugit sivilisutiginissaa ilimagineqarpat, taava ilaasorta q sulinnigiffeqarallarnissamik qinnuteqassaaq.

§ 7. § 5 malillugu najuunnissamut akornuserneqarneq napparsimanermik pissuteqavissumilluunniit najuunnissamut akornuserneqarnermik pissuteqarpat, § 5-ilu naapertorlugu piffissaagallartillugulu nalunaaruteqartoqarlunilu ilisimatitsissuteqartoqarpat, najuutinnginneq akuerineqartutut isigineqassaaq, Inatsisartut Siulittaasoqarfiat allamik nalunaanngippat. Imm. 2. Imm. 1-imi taaneqartutut ilumut akornusiuttoqarnera pillugu uppernarsaammik Inatsisartut Siulittaasoqarfiat piumasaqaateqarsinnaavoq.

§ 8. Pisunut § 7-imi taaneqartutut inngitsunut atatillugu qaammatisiutit malillugit ullut 14-it tikillugit najuutinngikkallarinnissamut Inatsisartut Siulittaasoqarfiat akuersissuteqarsinnaavoq, taamatut qinnuteqarneq ilaqtariiussumi isiginiagassanik pingaarutilinnik imaluunniit pissutsinik immikkut ittunik allanik tunngaveqarpat Siulittaasoqarfiup naliliinera malillugu itigartissallugu naapertuuttussaannigsumik.

Suleriaatsimi § 13 naapertorlugu najuutinngikkallarnerit sorliit inatsisinut naapertuuttuunersut Siulittaasoqarfimmit aalajangerneqartarpoq.

10

Inatsisartut Ombudsmandiat

Inatsisartut Ombudsmandiat aaqqissuussaanikkut Inatsisartut ataanni inissisi-mavoq. Ombudsmandi Inatsisartunut qinersereernerit tamaasa - atorfiullu inut-taarunneratigut Inatsisartunit qinerneqartarpoq. Ombudsmandip Atorfeqarfia naalakkersuinikkut arlaannaannulluunniit pituttorsimasuunngilaq.

Namminersorlutik Oqartussat kommunillu inatsisit malittarisassallu allat pisortat ingerlatsinerannut atuuttut malillugit ingerlatsinerannik nakkutillineq Ombudsmandip suliassaraa.

Ombudsmandi innuttaasunit naammagittaalliutit tunngavigalugit sulivoq - imaluunniit sulianik nammineerluni sularisassannngortitsisarluni. Ombudsmandi tamatumani aalajangiinerit, suliamik ingerlatsinerit pisortallu innuttaasunik pinninnerat pillugu naammagittaalliutinik sularinnittarpoq. Ombudsmandip tamatuma saniatigut ingerlatsiviit il.il. Ombudsmandip suliassaqaqfigisaanut ilaasut misissuiffigiartorlugit takuniaavigisinnaavai. Ombudsmandi 1. januar 1997 aallarnerfigalugu sulianik Inissiaatileqatigiiffik INI A/S-imut tunngasunik suliaqarsinnaalerpoq, tassani suliat inissiaatileqatigiiffiup Namminersorlutik Oqartussat kommunillu sinnerlugit aalajangiiffigisai pineqarlutik.

Malittarisassat pingaernerit:

- kinaluunniit Ombudsmandimut naammagittaalliuteqarsinnaavoq
- suliamik allaffissornikkut aqutsinermi sularinninneq inaarlugu sularineqarsi massaag aammalu oqartussaasumut qulliunerusumut naammagittaalliornis-samut periarfissaqarpas periarfissaq tamanna Ombudsmandimut naammagit-taalliunnginnermi atorfeqarsimassaag.
- Naammagittaalliut ukiup ataatsip qaangiutinnginnerani tunniunneqariissaaq

Naammagittaalliornissamut piffissaliussaq qaangiussimappat - naammagittaal-liortulluunniit allaffissornikkut naammagittaalliornissamut periarfissani ator-simangippagit naammagittaalliutit sularineqarnissaa Ombudsmandip itigartitsissutigissavaa. Aamma Inatsisartut suliamik pineqartumik sularinnile-reersimappata Ombudsmandip naammagittaalliutit sularinissaa itigartissavaa. Taamaamat naammagittaalliortup Ombudsmandimut naammagittaalliorsinnaa-nera mattukkumanagu Inatsisartut suliassanik ataasiakkaanik suliaqarnissartik nalinginnaasumik tunuarsimaarfisarpaat.

Ombudsmandi suliaq pillugu aalajangiisnaannngilaq - taarsiulluguli allaffissor-nikkut aqutsisoqarfiup kukkunerinik isornartorsiulluni oqaaseqaateqarsinnaa-voq, sularlu oqartussaasup suliareqqissagaa inassuteqaatigisnaallugu. Misissuinerit Ombudsmandimit namminermit aallartinneqartut kingorna oqaase-qaateqarfigalugit tamanut saqqummiunneqartarput, tassani Ombudsmandi apeqqutit suliambut tunngasut pillugit isummernini pillugu nassuaateqartarpoq.

Inatsisini, nalunaarutini malittarisassanilu allani kukkunerit amigaatillu saniatigut oqartussaasut suliaanni kukkunerit sumiginnaanerillu annertuut Ombudsmandip Inatsisartunut Naalakkersuisunullu (/kommunalbestyrelsimullu) nalunaarutigis-sussaavai. Kukkunertut nalilernerneqartut tassaapput teknikikkut inatsisilerinikkul-lu amigaatit. Inatsilli naleqquttuunersoq pisariaqartuunersorluunniit Ombuds-mandip isummerfigissannngilaq.

Atorfeqarfimmi aaqqissuussaanikkut pissutsit kiisalu suliat Ombudsmandip

qaammatisiutit ukiuanni qaangiuttumi suliarisimasai pingaarnerit pillugit ukiumoortumik nalunaarummik Ombudsmandi ukiut tamaasa Inatsisartunut tunniussisarpoq. Ukiumoortumik nalunaarut Inatsisinut Ataatsimiititaliamut tunniunneqartarpoq, taannalu nalunaarutip akuerineqarnissaa pillugu aalajangiif-figisassatut siunnersuummik Inatsisartunut saqqummiussisarpoq.

Sukumiinerusumik paasisaqarit: www.ombudsmand.gl

11

Inatsisartut Allattoqarfiat
– suliassat allattorsimaffiat

Inatsisartut Allattoqarfiat Inatsisartunut allaffissornikkut kiffartuussiviuvoq. Allattoqarfiup pingaarnertut suliassai malittuaniittumi nalunaarsorneqarput. Immikkoortortat ataasiakkaat sulisullu pillugit paasisutissat www.ina.gl –imi kiisalu E-mailnut nalunaarsuiffimmi nassaarineqarsinnaapput. Sulisutaaq ataasiakkaat pillugit erseqqinnerusumik paasisutissat mappersakkami uani nassaarineqarsinnaapput; “Inatsisartut Allattoqarfiat – ilinnut kiffartuussivik”.

2021-mi aggustip ulluisa aallaqqaataanni Inatsisartut Allattoqarfianni allaffissornerup nutaamik aaqqissuussaanaera eqqunneqarpoq.

Allattoqarfik pisorta qarfilerlugu aaqqissuussaalerpoq, pisortat assigiinngitsut immikkoortortanik assigiinngitsunik akisussaaffeqarlutik. Tamatumunnga atatillugu pisortat nutaanik marlunnik amerlineqarput, tassa Ataatsimiititaliat allatseqarfiannut pisortamik kiisalu Sulisoqarnermut allaffissornermullu immikkoortortamut nutaamik pilersinneqartumut immikkoortortami pisortamik.

Tamatumunnga atatillugu taamatutaaq atorfiit taaguutaannik allanngortitsisoqarpoq, Allattaaneq maanna Pisortatut taaguuteqalerluni allattoqarfiullu pisortaa pisortat tulliatut taaguuteqalerluni.

Pisortaq

Pisortaq Inatsisartut Allattoqarfianni pingaarnertut akisussaasuvoq. Pisortap suliassai pingaarnertit ilaatigut tassaapput:

- Inatsisartut allaffeqarfianni aqutsisutut pingaarnertut akisussaaffeqarneq
- Naalakkersuinikkut tunngasutigut inatsisartutigoortumillu sinniisoqarfinnut atatillugu Siulittaasoqarfiup suliniutaasa ingerlataasalu ataqatigiissarneqarnerannut ingerlanneqarnerannullu akisussaasuuneq
- Inatsisartuqarnikkut sinniisunik qaaqquisarnerit tikeraartitsitsisarnerillu
- Ataatsimiinnissanut oqaluuserisassanik piareersaarnertit
- Naalakkersuisut aqutsineranni attuumassutilinnut attaveqaataaneq
- Ataatsimiinnissanut oqaluuserisassanik piareersaarnertit
- Siulittaasoqarfiup suliniutai pillugit partiit allatseqarfiinut tunngatillugu ataqatigiissarnerit
- Naalagaaffeqatigiinnermut tunngatillugu inissisimaneq
- Suliffeqarnikkut kattuffinnik isumaqatiginninniarnerit

Siulittaasoqarfiup allatseqarfia

Siulittaasoqarfiup allatseqarfia Siulittaasoqarfimmu kiffartuussisuvoq pisortap tulliaata taani suleqataasunik aalajangersimasumik amerlassusilinnik sulisulik. Suliassai pingaarnertit ilaatigut makkuupput:

- Inatsisartut Siulittaasuannik Siulittaasoqarfimmillu sullissineq
- Suleriaaseq pillugu Ataatsimiititaliamik sullissineq
- Qinigaanerup Misilinneqarnissanut Ataatsimiititaliamik sullissineq
- Inatsisartut Siulittaasuannut Siulittaasoqarfimmullu allattaavissornermik (ileqqussanik malinninnissamik) isumaginninneq
- Inatsisartut ataatsimiinnissanut oqaluuserisassanik suliaqartarneq
- Inatsisartut Siulittaasuata Siulittaasoqarfimmi suliassaanik Nunallu Avannarliit Killiit Siunnersuisoqatigiiffianni aallartitanut siulittaasutut suliassaanik isumaginninneq

- Siulittaasoqarfiup ataani ilaasortat inssiassaannik sanaartornissamik siunnersuummut tunngatillugu suliassamik takkuttunik suliaqarneq

Saaffigininneq pisortap tullianut pissaaq.

Inatsisilerinermi pisortaq

Inatsisilerinermi pisortaq siulittaasumut siulittaasoqarfimmullu inatsisilerinikkut sullissisarpoq kiisalu allattoqarfimmut inatsisartunullu nalinginnaasumik inatsisilerinikkut siunnersuisarluni. Inatsisilerinermi pisortap pisortaq qullersarivaa.

Ataatsimiititaliat allatseqarfiat

Ataatsimiititaliat allatseqarfiat ataatsimiititaliat sulineranni ikiorsiisarput, Inatsisartunullu ilaasortanut tamanut suliassat pillugit siunnersuinissamut piareersimasuullutik. Ataatsimiititalianut allatsit ataasiakkaat tamarmik ataatsimiititaliap sullissami suliassaqarfii pingaarnertut sammisarivaat.

Ataatsimiititaliat allatseqarfiat allaffiup pisortaanit aqunneqarpoq.

Suliassat pingaarnertit ilaatigut makkuupput:

- ataatsimiigiaqqusissutinik/imaqarnilianik, allakkatigut apeqqutinik ataatsimiititalianullu saaffiginissutinut akissutinik piareersaateqartarneq suliaqar-tarnerlu
- isumaliutissiissutinut missingiusiortarneq
- ataatsimiititaliat sammisaannik tamanik ataqatigiissaarisarneq aqqissuus-sisarnerlu, soorlu angalanernik, avataaneersunik ataatsimeeqateqarnernik, ataatsimiititaliamut sassartitaqarnernik, Naalakkersuisumik siunnersuinernik il.il.
- ilaasortat siunnersuutaannik inatsisilerinikkut misissuineq
- Inatsisartut ataatsimiinneranni ataatsimiinnermik aqutsisumik allatseqar-nikkut ikiuuttarneq

Saaffigininneq allaffiup pisortaanut ataatsimiititalialluunniit allattaannut ataa-siakkaanut imaluunniit ugguuna pissaaq; ina@ina.gl

Inatsisilerinermut immikkoortortaq

Inatsisilerinermut immikkoortortaq inatsisilerituunik ataatsimiititalianut allat-taasunik aalajangersimasumik amerlassusilinnik inuttaligaavoq. Suliassai pi-ngaarnertit ilaatigut makkuupput:

- Inatsisissanik misissuisarneq
- Ataatsimiititaliat allatseqarfianni inatsisilerinikkut nalinginnaasumik ikiuut-tarneq

Saaffigininneq ataatsimiititaliat allatseqarfianni inatsisilerituumut pineqartu-mut pissaaq.

Nutserisoqarfik

Allakkatigut nutsigassat oqaluttaanerillu nutserisoqarfimmit isumagineqarput, tamanna nalinginnaasumik kalaallisut danskisullu oqaatsit akornanni, pisariaqarfiatigullu tuluttuumut. Ataatsimiititaliat tamarmik aalajangersimasumik nutse-risoqarput/oqalutseqarput. Suliassat pingaarnertit ilaatigut makkuupput:

KAPITALI 11

- pappilianik ataatsimiititaliani atortussanik tamanik nutserineq
- Allattoqarfimmit saqqummiussassanik nutserineq – ilitersuutiniq, ukiumoortumik nalunaarutiniq, nittartakkap imarisaanik il.il.
- Ataatsimiititaliat suliaqarneranni oqaluttaaneq, tassani aamma ataatsimiinnerini avataaneersunillu ataatsimeeqateqarnerini, angalanerini il.il.
- Inatsisartut ataatsimiittarfianni isumaqatigiinniarnerni oqaluttaasarneq

Saaffigininneq nutserisut pisortaannut pissaaq.

Aningaasaqarnermut immikkoortortaq naatsorsuuserivillu

Allattoqarfimmi ulluinnarni aningaasaqarnermik aqutsineq aningaasaqarnermut immikkoortortamit naatsorsuuserivimmillu isumagineqarpoq. Suliassai pingaarnerit ilaatigut makkuupput:

- naatsorsuutiniq inissitsiterineq aamma ilanngussanik nakkutilliineq (angalanernit naatsorsuutit, akileeqqusissutit il.il.)
- naalakkersuineramik suliaqarnermut tapiissutiniq tunniussisarneq aqutsinerlu
- Inatsisartut ataanni aningaasaliissutitut missingersuusionerit malitseqartitsinerlu
- missingersuutit malitseqartinneqartarnerat ukiumullu naatsorsuutit pillugit ingerlaavartumik nalunaarusiortarneq
- aningaasanut inatsimmut ilassutitullu aningaasaliissutissanut inatsimmut ilassutissanik suliaqartarneq
- naatsorsuusiortarnermut maleruagassat malinneqarnerannik isumannaarineq
- kukkunersuiusumut akisussaasumut attaveqarneq (tamanna Allattaaneq peqatigalugu)
- naatsorsuutiniq naligiissaarineq
- aningaasarsianik, soraarnerussutisianik ilaasortaajunnaarneriutinillu aqutsineq

Saaffigininneq Siulittaasoqarfiup allatseqarfianut pissaaq.

Paasissutissiisarnermut suliniutinullu immikkoortortaq

Paasissutissiisarnermut suliniutinullu immikkoortortaq Inatsisartut Allattoqarfiata avammut attaveqarneranik isumaginnittuvoq. Ilaatigut pingaarnertut makku suliassaralugit:

- Innuttaasunut Inatsisartut pillugit saqqummiussisarneq, tassani aamma Siulittaasoqarfik, ataatsimiititaliat Allattoqarfillu sinnerlugit tusagassiorfinnut nalunaaruteqartarneq
- ukiumoortumik nalunaarutiniq, innuttaasunut, atuarfinnut il.il. paasissutissiisutiniq assigiinngitsunik suliaqartarneq
- pulaartunik angalaarussisarnermut akisussaasuuneq
- innuttaasut Inatsisartullu Allattoqarfiata akornanni attaveqaataaneq

Sullissinermut immikkoortortaq

Inatsisartut ataatsimiinnerannut nalinginnaasumillu ingerlatsinermut atatillugu ulluinnarni suliassanik assigiinngitsunik sullissinermut immikkoortortaq isumagisaqarpoq.

Sulisooqarnermut allaffissornermullu immikkoortami immikkoortamut pisortaq

sullissinermut immikkoortortamut qullersaavoq.


Suliassai pingaarnert ilaatigut makkuupput:

- Inatsisartunut ilaasortanut aamma Inatsisartut Allattoqarfianni sulisunut kif-fartuussineq (Illorsuarmut, pequtinut atortunullu aamma ininut oqarasuaati-nullu il.il. akisussaaffeqarneq)
- allakkanik nalunaarsuiffik aamma allagaasivik – tassani aamma Inatsisartut ataatsimiinnissaannut atortussanik tigooqqaaneq
- ataqatigiissaarineq, tamatumaniitaaq Inatsisartunut ilaasortat angalanerisa aamma ineqarnerisa isumagineqarnerat
- atortussanik amerlisaaneq agguaassinerlu
- ataatsimiititaliat ataatsimiinnerini aqqissuussinernilu allani nerisaqartitsi-neq
- nalinginnaasumik torersaaneq
- pulaartunik angalaarussinermik isumaginninneq

Aqqissuussaaneq

Immikkoortortat qulaani pineqartut aqqissuussaanagermi malittuani takutinne-qartutut inissisimapput:

AAQQISSUGAANEQ
Inatsisartut Allatoqarfiat



12

Pissutsit suliassanut
tunngasut

Inuttut paasisutissat

Inatsisartunut qinersinerni ilaasortat tamarmik Inatsisartut Allattoqarfiannut paasisutissanik makkuninnga tunniussaqaassapput:

- Inuup normua
- Najugaqarfigisaq
- Qqarasuaatit normui
- Aningaaserivik pillugu paasisutissat
- Akileraartarnermut allagartaq kiisalu
- Pisariaqarpat e-maili/faxip normua

Paasisutissat tamarmik isertuullugit toqqortarineqassapput. Paasisutissat allanngornerat Allattoqarfimmut nalunaarutigineqassaaq.

Paasisutissanik qulaani pineqartunik tunniussineranut immersugassat uani nassaarineqarsinnaapput; intra.ina.gl/immersugassat, taakkulu qarasaasiakkut immersorneqassapput. Immersugassat immersorsimasut Allattoqarfimmi Siulittaasoqarfiup allatseqarfianut tunniunneqassapput.

Ilinniakkat suliffigisimasallu pillugit paasisutissat (CV)

Qinersinerup kingorna piaarnerpaamik ilaasortat ilinniakkatik suliffigisimasatillu pillugit allaaserisamik paasisutissanilluunniit nittartakkami kikkunnulluunniit takuneqarsinnaasunngorlugit tamanut saqqummiukkusutaminnik nassiussissapput. Paasisutissanik pineqartunik nutarterinissaq ilaasortat ataasiakkaat namminneq akisussaaffigaat.

Ataatsimiitaliat angalanerisa ilaanni, nunani tamalaani ataatsimiinnerni, soorlu EU-mi, ilinniakkat suliffigisimasallu pillugit paasisutissat aamma ujtartorneqar-tarput.

Ilinniakkat suliffigisimasallu pillugit paasisutissanik (CV) immersugassaq uani nassaarineqarsinnaavoq; intra.ina.gl/immersugassat, taannalu qarasaasiakkut immersorneqassaaq. Immersugassat immersorsimasut ina@ina.gl-imut nassiunneqassapput.

Namminerisamik atuuffinik inuussutissarsiutinillu nalunaarsuinerit

2015-imi juulip ulluisa aallaqqaataaniit Inatsisartunut ilaasortat inatsisitigut pisussaaffiliisumik inuttut atuuffitik inuussutissarsiutinillu pillugit paasisutis-saatitik Inatsisartut inuussutissarsiutinut nalunaarsuiffiannut pinngitsooratik nalunaarsortittussaalerpaat. Qinigaasinnaanerup akuerineqarnerata kingorna qaammat ataaseq qaangiuppat paasisutissat tunniunneqareersimassapput. Inatsit aamma sinniisussanut Inatsisartunut sivikinnerpaamik ulluni 30-ni imaluunniit killissaa aalajangigaanngitsumik siviussusilikkami ilaasortanngor-tunut atuuppoq. Sinniisussanut killiliussat ullut 30-iupput. Suleriaasissami § 56, imm. 4 naapertorlugu paasisutissat Inatsisartut nittartagaanni tamanut saqqummiunneqassapput.

Inuussutissarsiutit aningaasaqarnikkullu soqutigisat pillugit immersugassaq pissusissamisoortoq uani nassaarineqarsinnaavoq; intra.ina.gl/immersugassat, taannalu qarasaasiakkut immersorneqassaaq. Immersugassat immersorsimasut Allattoqarfimmi Siulittaasoqarfiup allatseqarfianut tunniunneqassapput.

Nalunaarutiginnissimanginnermut kinguneqartitsissutit assigiinngitsut naalak-
kersuinikkut sulinermut aningaasatigut tapiissuteqartarnek pillugu Inatsisartut
inatsisaanni § 4-mit aalajangersarneqarsimapput. Piffissaq eqqorlugu tunnius-
sinngitsoorneq qinigaasunut tapiissutinik tapiissutinillu allanik pissarsinngit-
soornermik kinguneqarsinnaavoq. Nalunaarsuinngitsoornermi imaluunniit
nalunaarutigineqartut amigarpata ingasattumilluunniit amigaateqarpata qiniga-
aitaqarnermut tapiissutit utertinneqarnissaat aamma piumasaqaatigineqarsin-
naavoq.

Assilisinneq

Inatsisartunut ilaasortat tamarmik qinigaanerup imaluunniit Inatsisartunut iser-
nerup kinguinnguutigut assiliseqqullugit qinnuigineqarput.

Assip atorineqarfissai/siunertai:

- Inatsisartut illuutaannut isissummut atugassamik
- Inatsisartunut ilaasortat www.inatsisartut.gl-imi Inatsisartut Ukiumoortumik
Nalunaarutaanni saqqummersittagaannilu allani kiisalu tusagassiutini avam-
mut sammisumik kiinnernissaat.
- nunanut allanut angalanissanut tunngatillugu visumimik il.il. qinnuteqarnissa-
mut atugassamik.

Angallammik nammineq pigisamik imaluunniit attartukkamik angallateqarneq

Pisortat angallassissutaasa atornissaannut taarsiullugu ataatsimiiffissamut
tassanngalu nammineq angallatigisaq atorlugu Inatsisartunut ilaasortaq angala-
rusuppat ikummatissamut aningaasartuutit tamatumunnga atorineqartut anner-
toqataat periaaseq malillugu Inatsisartut Allattoqarfiata utertillugit akilertus-
saavai. Pisanek malillugu aningaasartuutitut uppernarsaatitut ilanngussat
naatsorsuuseriviup kukkunersiuisarfiullu atugassaat saqqummiunneqassapput.
Dankortimit uppernarsaat erseqqinnerusumik takussutissartaqanngitsoq tunniu-
tissallugu naammangilaq. Pisortat angallassissutaannut bilitsip akikinnerpaap
akia tamarmiusoq sipporlugu kiisalu aqqutaani pisarialimmik unnuisoqartariaqar-
simappat saniatigut aningaasartuutaasinnaasut angalanerullu sivikinnerunera
pissutigalugu ullormusiassanit sipaarutaasimasinnaasut utertillugit akilerneqar-
sinnaanngillat. Nammineq angallatip atornissaanik kissaateqarnerup kingune-
risaanik bilitsit qularnaveeqqusiinerillu inniminneriikkat atortussaajunnaar-
sinnerinut Inatsisartut Allattoqarfiat aningaasartuuteqartariaqarsimappat
aningaasartuutit taakku aamma ilanngullugit Allattoqarfiup akiligaanut ilanngaa-
tigalugit naatsorsorneqassapput.

Angalanissat, unnuinissat il.il. inniminneriikkat atortussaajunnaarsinnerisigut
aningaasat maangaannartinginnissaat siunertaralugu nammineq angallatip ator-
nissaanik kissaateqarneq sapinngisamik siusissukkut Inatsisartut Allattoqarfian-
nut nalunaarutigineqartariaqarpoq. Nammineq angallatip atorneranut atatillugu
aningaasartuutit allat, assersuutigalugu sissiukkami inissaqartitaanermut,
sillimmasiissummut, isumannaatsuunermi atortut pisariallit pissarsiarinerinut,
motorip iluarsaatsinneranut imaluunniit nammineq angallatip atornerata kingu-
nerisaanik aningaasartuutitut allanut tunngasut Inatsisartut Allattoqarfiata
utertillugit akilertussaannngilai.

Ilaasortat namminneq angallatiminnik atuinerminni angalanermut pisortat sillimasiisarnernannut nalinginnaasunut ilaatinneqanngimmata immikkut erseqqisaatigineqassaaq. Taamaattumik angalaneq aallartitsinnagu isumannaatsuunik-kut pissutsit tamaasa qulakkeernissaat ilaasortap nammineq akisussaaffigai. Assersuutigalugu ajunaarnert, toqumik kingunerinnermut, umiunermut, kinguaattoornert, pigisat annaernerannut ajoqusernerinulluunniit imaluunniit nammineq angallatip atornissaanik kissaateqarnerup kingunerisaanik aningaasartuutit allat Inatsisartut Allattoqarfiata akisussaaffiginngilai.

Ataatsimiinnermut peqataajartorluni peqataaereermilu angalanissani pisortat angallassisutaasa atornissaannut taarsiullugu Inatsisartunut ilaasortaq umiatsiamik attartukkamik atuerusuppat tassani attartornermut aningaasartuutit periaaseq malillugu Allattoqarfiup utertillugit akilissavai. Aningaasartuutitut uppersaaitut ilanngussat pisarnertut saqqummiunneqassapput. Pisortat assartuutaannut bilitsi akikinnerpaaq atorlugu angalanerup akissaralua qaangerlugu aningaasartuutit angalanermilu akunnittarfimmi/ umiartortut angerlarsimaffianni unnuisoqartariaqarsimappat akilikkanut aningaasartuutit utertillugit akilerneqarsinnaanngillat. Umiatsiamik attartornerup kingunerisaanik bilitsit qularnaveeqqusiinerilluunniit inniminneriikkat atortussaajunnaarsinneranni Allattoqarfik aningaasartuuteqartariaqarsimappat aningaasartuutit taakku Allattoqarfiup akilersimasai utertillugit akilersinneqassapput. Umiatsiat angallassisinaanermut akuerisaasut (umiatsiat P-mik akuerisaasunik taaneqartartut) kisiisa attartortarnissat ilaasortap nammineq akisussaaffigaa. Ilaasortarli taamaakkaluortoq umiatsiamik P-mik akuerisaanngitsumik attartorpat tamanna ilaasortap nammineq akisussaaffigissavaa. Taamatut umiartornerit Allattoqarfiup sillimasiisutaasa matususerneq ajorpai, assersuutigalugulu umiatsiat P-mik akuerisaanngitsut atornerisigut ajunaarnerni, toqukkut qimagunnerni, kinguaattoornerni, umiunerni, motoriiarnerni, pigisat annaerneranni ajoquserneriniluunniit aningaasartuutit aningaasartuutilluunniit allat akilernissaat Allattoqarfiup akisussaaffigisinnaanngilai.

Umiatsianik attartornerni suniluunniit KNAPK-p akigitassatut najoqqutassiaasa qaangerneqannginnissaat qulakkeerniarneqartariaqarpoq.

Isissutissat/matuersaatit

Inatsisartunut ilaasortanngornermi Inatsisartut illuutaannut isissutissat matuersaatillu tunniunneqassapput. Taakku marluusut tamarmik inummut tungalluinnartuupput inunnullu allanut tunniunneqartussaananik. Isissutissat matuersaatilluunniit tamarneqarpata tamanna ingerlaannaq Sullissinnermut immikkoortortamut nalunaarutigineqassaaq. Isissutissaq matunut silarlernut matullu ilorliit ilaannut atugassaapput, matuersaatilli nalinginnaasumik allaffigisat matuinut atorneqartarlutik. Ilaasortat tamarmik immikkut Inatsisartut torsuusannut, namminneq allaffimminnut aamma partiit atortorissaarutaateqarfiinut isersinnaapput.

Allaffiit nalinginnaasumik ammasarfiisa avataanni isissutissaq kode isissutissamik piginnittut inuttut normuisa kingulliinik sisamanik normutalik kipparissumillu naggasigassaaq atorneqassaaq. Isissutissamik /matuersaatinik atuinerit nalunaarsorneqartarput.

Matuersaatit ingerlaavartumik immerneqartassapput, siunertamut tassunga karsit ivertitat saaffiginntarfiup tunuani iikkamiipput.

Isissutissaq matuersaatillu Sullissinnermut immikkoortortamit tunniunneqassapput aamma tassunga isissutissat katatat, kukkusut assigisaannilluunniit ajoqutilit saaffiginissutigineqassapput.

Ineqartitaaneq

Ilaasortat Nuup avataaneersut Inatsisartut ataatsimiinneranni inissamik Inatsisartut Allattoqarfiannit atugassinneqassapput. Erseqqinnerusumik paasisa qarumallutit **intra.ina.gl**-imi quppersagaq una takuuk; Inatsisartut ataatsimiinnerisa nalaanni ineqartitaaneq.

Nuummi ineqarnermut neqeroorutit quppersakkami uani takukkit; **Aningaasarsiaqartitaaneq ineqartitaanerlu.**

Allaffik pissutsillu sulinermut tunngasut

Inatsisartunut ilaasortat tamarmik partiit torsuusaanni allaffimmik atuisinnaatitaapput. Allaffimmiipput atortut nalinginnaasut soorlu oqarasuaat, qarasaasiaq, nerrivik, issiavik, allagarsiivik, saagut il.il. Tamakku saniatigut ilaasortat tamarmik allaffimminnik aaqqissuussinissaminnut tikilluaqqusaapput. Pequtit immikkut ittut atugassiussutigineqanngillat. Partiit torsuusaanni allaffinnut tunngatillugu kissaatigisat tamarmik Inatsisartut Allattoqarfiannit sapinngisamik akuersaarniarneqartarput. Inilli killiliisuupput. Pequtit, atortut il.il. ilaasortanut aamma partiit allatseqarfiinut atukkiunneqartut tamarmik Allattoqarfiup pigisaatut isigineqarput taamaattumillu aallaavittut ininit pineqartunit peerneqartussaanatik. Pequtit, atortut il.il. ilaasortat Inatsisartuni sulinerminnut attuumasuteqartillugit taamaallaat atorsinnaavaat, taamaattumillu Allattoqarfiup pigisat assersuutigalugu namminersorluni inuussutissarsiutigisanut atorneqaqqusaanngillat. Atornerluisoqartillugu pequtinik, atortunik il.il. arsarinnittoqassaaq.

Amerlisaatit (kopimaskiner), tassunga ilanngullugit blækkit, papilissat il.il. partiit torsuusaannut inissinneqarsimasut partiit allatseqarfiinit nammineq aquneqarput.

Pulaartut

Inatsisartuni isumannaallisaaneq pillugu malittarisassat naapertorlugit pulaartut tamatigut ingiaqatigineqartassapput. Partiit allatseqarfiini ataasiakkaani Inatsisartunut ilaasortat ataasiakkaat pulaartutik isaarissap eqqaanut aasassavaat tamatumalu kingorna anilerpata aamma qanillugit. Pulaartut ingiaqateqaratik namminneq angalaassanngillat.

Visitkortit

Aalajangersimasumik Inatsisartunut ilaasortat sivisunerusumilluunniit sinniisusut visitkortinik inniminniissaminnut periaqarfissaqarput. Visitkortit nutaangitsut nunguppata aatsaat visitkortimik nutaamik inniminniisoqaqqissaaq (tamanna ilaasortaasimasunut qinigaaqqittunullu aamma atuuppoq). Allaffissornikkut aningaasartuutinik ikilisaajumalluni ataatsimut inniminniisoqartarpoq, taamaattumik inniminnikat tigunissaannut sapaatit akunneri arlallit ingerlasin-

naasarput. Visitkortip ilusissaa siumut aalajangerneqareertarpoq. Paasisutissat www.ina.gl-imit tiguneqassapput, paasisutissallu taakku ilaasortat ataasiakkaat namminneq Inatsisartut Allattoqarfiannut paasisutissiinerannik tunngaveqarput. Visitkortimut missingiut ilaasortamut pineqartumut akuerisassanngorlugu nassiunneqassaaq. Visitkortip naqinneqareerneratigut allannguutaasinnaasut kukkunerusinnaasullu iluarsineqarnissaat ilaasortat ataasiakkaat namminneq akisussaaffigaat, ilaasortap visitkort taamatut paasisutissartalergulu akuerisimappagu.

Inatsisartut ilisarnaataat namminerisamik visitkortinut atorineqassanngilaq. Visitkortinik iniminniissut ina@ina.gl-imut nassuineqassaaq.

Allagaasivik

Inatsisartunut ilaasortat partiillu tamarmik inini qullerni allagaasivimmik tunineqassapput. Allakkat Inatsisartut Allattoqarfiannit tiguneqartut aamma Allattoqarfimmit ilaasortanut /partiit nassiunneqartut tassani agguanneqartarput. Ilaasortat /partiit tamarmik allagaasivimmik ingerlaavartumik imaartarnissaat namminneq akisussaaffigaat. Inatsisartunit ataatsimiititalianillu allakkanik allanillu nassitsinermut aningaasartuutit Aningaasanut Inatsimmi Inatsisartunut aningaasaliissutinut matussuserneqartarput. Ilaasortat namminerisaminnik allakkanik/poortukanik Inatsisartut aqutigalugit nassitsinnaanngillat. Ilaasortat namminerminnut Inatsisartutigoorlugu nassiussanik tiguisinnaanerit nalinginnaasumik akuerisaavoq. Tamanna tiguisussap nammineq akisussaaffigisaanik pissaaq, adressellu allassimaffiani qullertut tiguisussap aqqa allassimassalluni. Allakkisartut (betjentit) Inatsisartullu Allattoqarfiat allakkanut/poortukkanut tammartunut akisussaannngillat.

Inatsisartut ataatsimiinneranni atorussat aallaavittut kalaallisut danskisullu tiguneqartarput. Ilaasortalli atorussanik kalaallisuinnarnik imaluunniit danskisuuinnarnik tiguisinissartik qinnuteqaatigisinnaavaat, soorluttaaq ilaasortat atorussanik elektroniskiinnarnik tiguisarnissartik toqqarsinnaagaat, tamanna ajornanngippat. Taamatut qinnuteqaatit Sullissinermut immikkoortortamut nassiunneqassapput.

Kaffisortarfik

Inatsisartut kaffisortarfiat Inatsisartut ataatsimiittarfiata ataani inissisimavoq. Kaffisortarfik Inatsisartunut aamma Naalakkersuisunut ilaasortanuinnaq Inatsisartut ataatsimiinneranni (aamma ataatsimiinnerisa avataanni) persuarsiorani ataatsimuualarfissatut eqqarsaataavoq.

Allat, tassunga ilanngullugit ilaqqat meeqqallu pulaartut, taamaalillutik aallaavittut kaffisortarfimmik atueqqusaanngillat. Malittarisassanik unioqqutitsisoqartillugu pulaartut Inatsisartunut/Naalakkersuisunut ilaasortamit pulaartitsisuusumit ingiaqateqassapput. Pulaartut kaffisortarfimmik atuisunut allanut akornutaassanngillat.

Angalasarnerit

Immikkorluinnaq pisoqartillugu piffissaalluortillugulu Allattoqarfik siumoortumik isumaqatigiissuteqarfigineqarsimatinnagu Inatsisartut ataatsimiinnerannut peqataajartornermi peqataaereernermilu angalanerni kiisalu ataatsimiititaliat angalanerini il.il. nassatat oqimaannerussutaannut aningaasartuutit **Allattoqarfiup utertillugit akiligassarinnilai.**

Pisortatigoortumik angalanerni ullormusiat tunniunneqartarput. Nerisaqarneq pillugu paasissutissat angalanermut naatsorsuutininut ilanngullugit Aningaasaqarnermut immikkoortortamut nalunaarutigineqassapput. Ullormusiat, utertoortissat il.il. pillugit annertunerusumik paasisaqarusukkuit quppersagaq Aningaasarsiaqartitaaneq ineqartitaanerlu takuuk.

Ataatsimiititaliat il.il. angalaneranni akunnittarfimmik toqqaaneq “Pisortat suliffeqarfiutaat pillugit akunnittarfinnik isumaqatigiissutinik” tunngaveqassaaq. Ineeqqat nalinginnaasut taamaallaat inniminnerneqassapput. Allattoqarfimmi ukiorpassuarni periutsit malillugit Inatsisartunut siulittaasoq kisimi inimi akisunermiissinnaatitaavoq. Tamanna Inatsisartunut aningaasartuutaanerussanngipat ineeqqamik marluuttarissamik taamaallaat inniminniisoqarsinnaavoq.

Pisortatigoortumik allatulluunniit angalanerni inuit attuumassuteqanngitsut Inatsisartunut ilaasortat Inatsisartut Allattoqarfiannit sullinneqarnerannut ilaatinneqanngillat, Inatsisartut ataatsimiinnissaannut angalanerit eqqaassanngikkaanni. Allattoqarfik immikkorluinnaq pisoqartillugu tunngavissaqavitsilugulu tamatumunnga ikiuussinnaavoq. Angalaqataasunut taamatut ittunut Inatsisartut Allattoqarfiat angalanernut aningaasartuutininut qaqugukkulluunniit akiliineq ajorpoq.

Air Greenlandimik Danmarkimut /mit angalanerni ilaasortat nalinginnaasumik Nanoq Classimi taamaaqataaniluunniit angallanneqartarput. Nunanut allanut angalanissami pissutsit angalanissamut qinnuteqaammut atatillugu nalilersorneqassapput. Atorfilittat angalaqataasut ilaasortat angallanneqarnerattut angallanneqassapput.

Matuma qulaaniittut periutsinik nassuiaataapput. Allattoqarfik pisuni tamani sapinngisamik assigiimmik aqutsiniartarpoq, pisunili aalajangersimasuni periutsinut allaanerusumik iliuuseqarsinnaasariaqarluni.

Ataatsimiititaliat angalasarnerat pillugit paasissutissanik amerlanerusunik pisarsiniaruit “Ataatsimiititaliat” takuuk. Ataatsimiititaliat angalanerini ataatsimiititaliallu sulineri pillugit siunnersuutit pisortatigoortumik angalanerni Inatsisartunut ilaasortanit peqataaffigineqartunut tamanut atuupput.

Angalanerni nammineerluni akiliutit

Angalanernut inniminnerneqareersunut nammineerluni allannguinnernut angalaitseqatigiiffimmit akitsuutit Inatsisartunut ilaasortamik namminermit akilerneqassapput, (marts 2021-mi allannguinnernut ataasiakkaanut 300 kr.)

Aallarfissanut inniminnerneqareersunut takkutinngitsoornermi Inatsisartunut ilaasortaangit nammineerluni angalanermut pineqartumut aningaasartuutininik tamanik akiliissaaq, tassa angalanermut Inatsisartut Allattoqarfiannit inniminnerne-

qarlunilu akilerneqartumut atuuttumik tunngavissaqarani takkutinnitsooruni.

Sillimmasiissutit

Sillimmasiinnermut uppernarsaatit immersugassat assigiinngitsut il.il. pillugit paasissutissat erseqqinnerusut uani takukkit; intra.ina.gl

Pikkorissartarnerit

Qinersisoqareerpat Inatsisartunut ilaasortanngortut tamarmik Inatsisartut Allattoqarfiannit ilisarititsilluni pikkorissartitsinermik neqeroorfigineqassapput. Pikkorissartitsinissat attuumassuteqartut assigiinngitsut ilaasortanut partiillu allattaannut ingerlaavartumik neqeroorutigineqartarput.

Pissutsit qarasaasiaqarnermut tunngasut

Inatsisartunut ilaasortanngornermi ilaasortanngortut tamarmik atuisutut taaguutitaassapput, taannalu qarasaasiamut, mailimut, intranetimut il.il. isissutissat atorneqassaaq. Isissutissaq qarasaasiamut iseqqaarnermi pilersinneqassaaq isertuussaalluinnartuussallunilu. Isissutissaq allanneqassangilaq allanullu tunniunneqassanani. Aaqqissuunneqarnerani atuisutut taaguutit toqqammavius-saaq taamaalillunilu qarasaasiamut aalajangersimasumut pituttorsimassanani. Taamaalillutit qarasaasiaq sunaluunniit atoralarukku aaqqissuunneqarnera taannaassaaq.

Partiit allatseqarfiini sulisut aamma taamatut isissutissanik tunineqassapput. Atuisutulli isissutissaq sulisunut Inatsisartuni Inatsisartoqarneq tunngavigalugu toqqaannartumik suliaqartunut taamaallaat tunniunneqassaaq. Taamaalilluni inuit taaneqartut saniatigut allat avataaniittut atuisutut pilersinneqarsinnaanngillat imaluunniit atortussaannik atugassinneqarsinnaanatik, soorlu partiit inuusuttunut immikkoortortaqarfiini ilaasortat.

Qarasaasiat allaffinni ataasiakkaaniittut LAN-imik attaveqaaserneqarsinnaapput. Tamatuma saniatigut Inatsisartut illuutaanni silaannakkoortumik internettimut attavilerfeqarpoq. Attaveqaatinut silaannakkoortunut ilitsersuut intra.ina.gl-i miippoq Inatsisartut illuutaasa avataanni ilaasortat ataasiakkaat internettimut attavilersinnissartik tamatumunngalu aningaasartuuteqarsinnaanertik namminneq akisussaaffigaat.

Filit sulininnut attuumassutilit qarasaasianni c-drevimut („skrivebord“ ilanngul-lugu) toqqussangilatit, tassami drevi taanna isumannaallisaalluni toqqorneqar-neq ajormat, taamaattumillu qarasaasiap qarasaanik ajutoornermi paasissutissat tammarneqassapput. Taarsiullugu f-drev atoruk, taanna attaveqaatiniippoq. F-drevimik atuisut partiikkuutaanut agguataagaapput, taamaalillutik partiit allat paasissutissaataannut isertoqarsinnaanani. F-drev isumannaallisarlugi toqqor-neqartarpoq.

F-drev filinut sulinnermut attuumassutilinnut taamaallaat atorneqassaaq. Nipilersukkat, assit filillu allat sulinnermut attuumassuteqanngitsut pisariaqartinneqar-pat qarasaasiap c-drevianut taamaallaat toqqorneqartariaqarput. Nipilersukkat, filmit assillu nalinginnaasumik aserfallatsaaliuinermi f-drevimit peerneqarnis-saat naatsorsuutigineqarsinnaavoq.

Namminerisamik filinik aallertarnek qarasaasiaqarnikkut isumannaallisaaneq eqqarsaatigalugu killeqartinneqassasoq kaammattuutigineqarpoq kiisalu mailinut, nalunaarutitut aamma inuit attaveqaataasigut il.il. nalunaarutit pasinartut pillugit mianersornissaq nalinginnaasumik eqqumaffigineqartariaqarluni. Taamaallitut inunnit ilisimaneqanngitsunit imaluunniit kinaassusersineqarsinnaanngitsunit mailinut kakkiussat, innersuussat assigisaallu ammarneqartariaqanngilat.

Tamakku saniatigut innersuussat aamma mailinut kakkiussat ammarneqassanngillat, nalunaarut nassitsisumit nammineq oqaaseqatigiilliorneqarsimasoq malinnaatinnepanngippat. Virusit saassusinerannik pasitsaassat ingerlaannaq Allattoqarfiup qarasaasiaqarneq pillugu siunnersortaanut nalunaarutigineqassapput, taannalu sulinnngippat Sullissinermut immikkoortotamut. Tamatuma saniatigut qarasaasiaqarnikkut isumannaallisaaneq pillugu Inatsisartut Allattoqarfiannit ingerlaavartumik kaammattuutit malinneqassapput.

Qarasaasiat pillugit saaffiginnissutit qarasaasiaqarnikkut siunnersortimut nassinneqartassapput. Namminerisamik atortunik ikiunnerit, ikkussuinerit il.il. aamma Inatsisartut illuutaasa avataanni ikiunnerit neqeroorutigineqarneq ajorput (sulinermut atatillugu qarasaasiaqqatigut e-mailimik atuinerup avataanniittut).

Atortut elektroniskiusut

Inatsisartunut ilaasortat allaffiminni qarasaasiamik programminillu assigiinngitsunik atorsinnaasaminnik atugassinneqassapput. Atortut nalinginnaasut aalajangersarneqarsimannngitsut atugassiissutigineqarneq ajorput, soorluttaaq atortunut nalinginnaasuunngitsunut ikiuttoqarneq ajortoq.

Partiinut tamanut ataatsimoortumik naqiterissutit (printer) saniatigut partiit ataasiakkaat naqiterissummik atugassaqartitaapput. Naqiterissut nammineq sulinermut attuumassuteqanngitsunik atugassatut naqitigassanut atorneqassanngilaq – atortunik atornerluineq piffissap ilaani naqiterissutinik atuisinnaajunnaarsitaanermik kinguneqarsinnaavoq.

Atortut tamarmik aamma qarasaasianut atortut assigiinngitsut paasissutissallu tamarmik piffissamut qinigaaffiusumut killiligaapput – taamaallit Inatsisartunut ilaasortaajunaarnermi qarasaasianut atortut utertinneqassapput, soorluttaaq mailimut attaveqaatit il.il. matuneqartussaasut.

Qarasaasianik atortunik atukkiunneqarsimasunik tammaasaqarnerni ajoqusii-nernilu ilaasortat ataasiakkaat taarsiissuteqarnissaat naatsorsuutigineqassaaq. Qarasaasianut atortut Inatsisartut pigisaattut isigineqarput, taamaattumillu isumaqatigiissut immikkut ittoq atorlugu atukkiineq atsiorlugu uppersarneqassaaq. Kukkunerit, ikiunnerit il.il. pillugit saaffiginnissutit qarasaasialeriner- mut siunnersortimut nassinneqassapput.

Email / qaammatisiutit

E-mailit, e-mailinut isertaatikku nalinginnaasukkut iserfigineqartarput, taanna aamma qaammatisiummik imaqarpoq. Inatsisartut attaveqaataannik qarasaasiaannillu atuinerni saniatigut isissutissat allat pisariaqanngillat. E-mailikkut

qaammatisiut pingitsoorani atuineqartussaavoq. Inatsisartut Allattoqarfianni najukkanut nalunaarsuiffimmut Inatsisartuni e-mailit tamarmiusut nalunaarsor-neqarnerannik imaqartumut e-mail atorlugu iserneq ajornangilaq, tassunga ilanngullugu qitiusumik allaffeqarfimmut.

Post.ina.gl-ikkut e-mailinut qaammatisiutinullu avataaniit isertoqarsinnaavoq. E-mailinut qaammatisiutinullu insertaat angallattakkanut oqarasuaatinullu ikkunneqarsinnaavoq. Taassuma ikkunneqarnissaa pillugu qarasaasiaqarnermut siunnersorti attaveqarfigineqassaaq.

E-mailimi programmit atorlugit ataatsimiinnissamik inniminniisoqartarpoq. Marloriaammik inniminniisarnerit pingitsoortinniarlugit ilaasortat qaammatisiutini namminneq isumaqatigiissutigisimasatik allattassagaat kaammattuutigineqarpoq, Inatsisartut Allattoqarfianit ataatsimiinnissanut inniminniinerit akineqarnerisa saniatigut. Tamatuma saniatigut ataatsimiinnissanut inniminnienerit suliassanut partiinut attuumassuteqartunut atoqqullugit partiit allatseqarfii kaammattorneqarput.

Taasisutissat

Taasisutissat Inatsisartunut aamma Naalakkersuisunut ilaasortanut tamanut qarasaasialerinerimik siunnersortimit tunniunneqassapput. Tunniussineq isumaqatigiissummut immikkut ittumut atsiorlugu uppersarsarneqassaaq.

Taasisutissaq inummut tunngalluinnartuuvuq taamaattumillu qaqugukkulluunniit inunnut allanut tunniunneqartussaananani. Taasisutissamik atornerluineq Inatsisartut ileqqorissaarnek pillugu malittarisassaannik unioqqutitsinertut isigineqarsinnaavoq aammalu piffissami ullut 14-it angullugit sivilissusilimmi Inatsisartunit akissarsiaqaataangitsumik mattunneqarnermik kinguneqarsinnaalluni.

Taasisutissaq ilaasortat ataasiakkaat Inatsisartut ataatsimiittarfianni issiaviisa saavanniittumut taasinermut atortumut ikkunneqassaaq taasinerni oqaaseqarnissamillu qinnuteqarnermi atornerqartussanngorluni. Taasisutissaq Inatsisartut ataatsimiittarfiannut isernermi ikkunneqassaaq ataatsimiittarfimmullu piffissami sivikikkaluamiluunniit qimanneqassanani.

Taasisutissat tammaasat ingerlaannaq qarasaasiaqarnermut siunnersortimut imaluunniit Inatsisartut Allattoqarfiannut nalunaarutigineqassapput.

Nittartagaq aamma nittartagaq matoqqasoq (intranet)

Inatsisartut namminneq www.ina.gl-imi imaluunniit www.inatsisartut.gl-imi nittartagaqarput. Tassani Inatsisartut ataatsimiinnissaanni atortussat nassaassapput (siunnersuutit, isumaliutissiissutit, partiit oqaaseqartartut ilanngussaaf il.il.) Tamatuma saniatigut paasisutissat allat attuumassuteqartut soorlu tusagassiorfinnut nalunaarutit, ataatsimiititaliat katitigaanerat, attaveqarfissat pillugit paasisutissat il.il. pigineqarput.

Intra.ina.gl-imi matoqqasumik nittartagaqarpoq (intranet). Tassani Inatsisartut nittartagaasa imarisaasa saniatigut paasisutissat illup iluaneersut nassaassapput – ilaatigut immersuiffissat assigiinngitsut, sillimmasiissutit il.il. Tamakku saniatigut qarasaasiakkoortumik atuagaateqarfeqarpoq.

Qarasaasiakkut atuagaateqarfik

Matoqqasumik nittartakkakkut ilaasortat, sulisut partiillu allatseqarfii tamarmik qarasaasiakkut atuagaateqarfimmut isersinnaapput. Qarasaasiakkut atuagaateqarfik Naalackersuisut allallu attuumassuteqartut misissuinerannik assigisaanillu 400-t sinneqartunik tamanut saqqummiunneqarsimasunik katersaateqarpoq. Naalackersuisunit nalunaarussiaq assigisaaluuniiit amigaatigineqarpat ataatsimiititaliami allatsi imaluuniiit Sullissinermut immikkoortorta q attavigineqarsinnaavoq.

Aamma matoqqasumik nittartakkamiipput Inatsisartut Allattoqarfiannit saqqummersitat paasissutissiisutillu.



Postboks 1060 · 3900 Nuuk

inatsisartut@inatsisartut.gl · www.inatsisartut.gl